

藏

書

藏書外臣傳目錄卷五十八

○外臣時隱門

○梅福

○逢萌王君公等

○周黨等

周燮馮良

韓康

范冉

漢濱父老

陳寔父老

魏桓

姜肱

申屠蟠

黃憲

戴良

袁閎

郭泰

徐學

管寧

王烈

夏馥

別見

○龐德公司馬德操

張璜

焦光

○李士謙崔廓

張文詡

元德秀

鄭遨等

南安翁

蘇雲卿

藏書外臣傳卷五十八

○時隱

○梅福

梅福字子真九江壽春人少學長安明尚書穀梁春秋爲郡文學補南昌尉後去官歸壽春數因縣道上言變事求假輶傳詣行在所條對急政輒報罷是時成帝委任大將軍王鳳鳳專執擅朝災異數見福復上書諫成帝久亡繼嗣福又以爲宜建三統封孔子大是之世以爲殷後先時匡衡議以爲王者存二王後所

以尊其先王而通三統也其犯誅絕之罪者絕而更封他親爲始封君以上承其王者之始祖今宋國已不守其統而失國矣則宜更立殷後爲始封君而上承湯統極是非當繼宋之絕侯也孔子曰丘殷人也宜以孔子世爲湯後上以其語不經遂見寢至是梅福復言之綏和元年乃立二王後下詔封孔子世爲殷紹嘉公福居家以讀書養性爲事元始中王莽顯政福一朝棄妻子去九江至今傳以爲仙其後人有見福於會稽者變名姓爲吳市門卒云卓吾曰此大有力

量人大不安靜人但抽身早爾

○逢萌徐房李子雲王君公

逢萌字子慶北海都昌人之長安學通春秋時王莽殺其子宇萌謂友人曰三綱絕矣不去禍將及人卽解冠挂東都城門歸將家屬浮海客於遼東萌素明陰陽知莽將敗有頃乃首戴瓦盎哭于市曰新乎新乎因遂潛藏及光武卽位乃之琅邪勞山養志修道後詔書徵萌託老耄迷路東西語使者云朝廷所以徵我者以其有益於政也今尚不知方面所在安能

濟時卽駕歸連徵不起以壽終初萌與同郡徐房平原李子雲王君公相友善並曉陰陽懷德穢行遠遁以去唯君公遭亂獨不去僧牛自隱時人謂之論曰避世墻東王君公嵇康高士傳曰君公明易爲數言事不用乃自汙與官婢通免歸詐狂僧牛口無二價也。

○周黨譚賢殷謨王霸

周黨字伯况太原廣武人王莽時託疾杜門自後賊暴從橫殘滅郡縣至廣武過城不入建武中徵爲議

郎黨遂將妻子居黿池復被徵乃着短布單衣縠皮
綃頭待見尚書及引見黨伏而不謁自陳願守所志
博士范升奏毀黨天子詔曰自古明王聖主必有不
賓之士伯夷叔齊不食周粟太原周黨不受朕祿亦
各有志焉其賜帛四十四匹初黨與同郡譚賢伯升鴈
門殷謨君長俱守節不仕建武中徵並不到王霸字
儒仲亦廣武人王莽篡位弃冠帶絕交宦建武中徵
到尚書拜稱名不稱臣

○周燮馮良

周燮字彥祖汝南人燮生而欽頤折頸醜狀駭人其
母欲棄之其父不聽曰吾聞賢聖多有異貌興我宗
者乃此兒也十歲就學通詩論及長專精禮易不修
似卓老賀問之好鄉黨宗族希得見者舉孝廉賢良方正特
徵皆以疾辭延光二年安帝以玄纁羔幣聘燮及南
陽馮良宗族勸之曰夫修德立行所以爲國自先世
以來勲寵相承君獨何爲守東岡之陂乎燮曰吾旣
不能隱處巢穴追綺季之跡而獨顯然不遠父母之
國斯固以滑泥揚波同其流矣夫修道者度其時而

動動而不時焉得享乎良字君郎年三十爲尉從佐奉檄迎督郵卽路慨然恥在廨役因壞車殺馬毀裂衣冠遁至犍爲從杜撫學妻子求索蹤跡斷絕後見草中有敗車歟馬腐朽衣裳謂爲虎狼盜賊所害發喪制服積十許年乃還燹良年皆七十餘終

○韓康

韓康字伯休常採藥名山賣於長安市口不二價者三十餘年時有女子從康買藥康守價不移女子曰公是韓伯休那乃不二價乎康歎曰本欲避名今小

女子皆知有我矣。乃遁入霸陵山中。博士公車連徵不至。桓帝備玄纁之禮以安車聘之。使者奉詔造康。康不得已。乃乘柴車。晨先使者。發至亭。亭長以韓徵君當過。方發人修道。橋及見康柴車幅巾。以爲田叟也。使奪其牛。康卽釋駕。與之有頃。使者至。與牛翁乃徵君也。使者欲奏殺亭長。康曰。此自老子與之亭長。何罪。康因遁。遁卒以壽終。

○范滂

范滂字史雲。陳畱外黃人。年十八到南陽。受業樊英。

又遊三輔就馬融、冉好、違時絕俗爲激詭之行常慕
梁伯鸞、閔仲叔之爲人與漢中李固、河內王奐親善
而鄙賈偉節、郭林宗焉桓帝時以冉爲萊蕪長遭母
憂不到官後議欲以爲侍御史因遁身逃命於梁沛
之間徒行敝服賣卜於市遭黨人禁錮遂推鹿車載
妻子捃拾自資或寓息客廬或依宿樹蔭如此十餘
年有時絕粒間里歌之曰甌中生塵范史雲金中生
魚范萊蕪中平二年年七十四卒臨命遺令敕其子
曰吾生於昏闇之世值乎淫侈之俗生不得匡世濟

時、歿、何、忍、自、同、於、世、氣、絕、便、歛、歛、以、時、服、衣、足、蔽、形、
棺、足、周、身、歛、畢、便、穿、穿、畢、便、埋、墳、封、高、下、令、足、自、隱、
知、我、心、者、李、子、堅、王、子、炳、也、今、皆、不、在、制、之、在、爾、勿、
令、鄉、人、宗、親、有、所、加、也、

○漢濱父老

漢濱父老不知何許人也延禧中桓帝幸竟陵過雲
夢臨沔水百姓莫不輟觀之者有老父獨耕不輟尚
書郎張溫使人問之老父不答溫乃下車自與之言
老父曰我野人也請問天下亂而立天子邪理而立

天子邪立天子以父天下邪役天下以奉天子邪昔
聖王宰世茅茨采椽而萬人以寧今子之君勞人自
縱逸遊無忌民無觀焉子又何故欲人之觀之乎溫
大慙問其姓名不告而去

○陳畱父老

桓帝時黨錮事起守外黃令張升去官歸道逢友人
共班草而言曰吾聞趙殺鳴犢仲尼臨河而反覆巢
竭淵龍鳳逝而不至今宦○其可日亂陷害忠良將性命
之不免矣因相抱而泣有陳畱老父趨而過之太息

言曰二丈夫何泣之悲也夫龍不隱鱗鳳不藏羽網羅高懸去將安所雖泣何及乎一人欲與之語不得而去

○魏桓

魏桓安陽人桓帝時數被徵其鄉人勸之行桓曰夫干祿求進所以行其志也今後官千數其可損乎廐馬萬匹其可減乎左右權豪其可去乎乃慨然嘆曰使桓行生或歸於諸子何有哉遂隱身不出

○姜岐

姜岐字子平恬居守道名重西州延熹中沛國喬玄
爲上邽太守召岐岐稱病不就玄怒敕督郵尹益收
岐若不起者趣嫁其母而殺之益不可玄怒搃益益
得杖諫曰岐少修孝義棲遲衡廬鄉里歸仁名宣州
里實無罪狀益故敢以從事中玄乃止岐隱居以畜
蜂豕爲事從學者滿天下營業者三百餘人百姓就
而居者數千家

○申屠蟠

申屠蟠字子龍陳留外黃人也少意氣父不進酒肉

者十餘年每忌日輒三日不食廬於冢側致甘露白
雉之異同郡繡氏女玉爲其妻年十五爲諸
王以告外黃令梁配配欲奪其女玉蟠時年十五爲諸
生進諫曰王之節義足以感無恥之孫激忍辱之子
不遭明時尚當旌表況在清聽不加哀憐乎配善其
言乃爲讞得減歟論鄉人稱美之家貧傭爲漆工郭
林宗見而奇之同郡蔡邕深重蟠及被州辟邕辭讓
之曰申屠蟠稟氣玄妙性敏心通喪親盡禮幾於毀
滅至行美義人所鮮能安貧樂道不爲燥濕輕重不

爲窮達易節方之於邕以齒則長以德則賢者也後
郡召爲主簿不行遂隱居精學博貫五經兼明圖緯
始與濟陰王子居同在太學子居臨歿以身託蟠蟠
乃躬推輦車送喪歸鄉里遇司諫從事於河輦之間
爲封傳護送蟠不肯受投傳於地而去事畢還學太
尉黃瓊辟不就瓊卒歸葬江夏四方名豪會帳下
者六七千人互相談論莫不慕之南郡一生與
相酬對旣別執蟠手曰君之志不可移如是相見於上
京矣蟠勃然作色曰君言也何意乃

少自任

卷三十一

爾因振手而去。不與實。道不就。先是京師游士汝南范滂等。非議執政。自公卿以下。皆折節下之。太學生爭慕其風。以爲文舉。與處士復用蟠。獨歎曰。昔戰國之世。處士橫議。列國之王。至爲擁篲。先驅卒有阬儒燒書之禍。今之謂矣。絕迹於梁碭之間。因樹爲屋。自同傭人。居三年。滂等果罹黨錮。或死或刑。唯蟠確然免於疑論。公蟠友人陳郡馮雍坐事繫獄。豫州牧黃琬欲殺之。或勸蟠救雍。蟠不肯行。曰。黃子琰爲吾故。邪未必合罪。如不用吾言。雖往何益。

琬聞之遂免雍罪大將軍何進連徵不詣進必欲致之使蟠同郡黃忠以書勸曰前幕府初開至如先生特加殊禮優而不名申以手筆而先生抗志彌高所尚益固竊謂先生高節有餘於時則未也今潁川荀爽載病在道北海鄭玄北面受署彼豈樂羈牽哉知時不可逸豫也昔人之隱遭時則放聲滅迹巢棲茹薇其不遇也則裸身大笑被髮狂歌今先生處平壤游人間吟典籍襲衣裳事異昔人而欲蹈其迹不亦難乎孔氏可師何必首陽蟠不谷中平五年復與爽

玄及潁川韓融陳紀等並徵不至明年董卓廢立蟠
及爽融紀等復徵唯蟠不到居無幾爽等爲卓所脇
迫西都長安京師擾亂公卿多遇兵飢室家流散融
等僅以身脫唯蟠處亂末終全高志年七十四終于
家

范曄贊曰琛寶可懷貞期難對道苟違運理用同廢
與其退棲豈若蒙穢悽悽碩人陵阿窮退

○黃憲

黃憲字叔度汝南慎陽人也世貧賤父爲牛醫潁川

荀淑遇憲於逆旅竦然異之揖與語移日不能去謂
憲曰子吾之師表也旣而前至袁閎所未及勞問逆
曰子國有顏子寧識之乎閎曰見吾叔度邪是時同
郡戴良才高倨傲而見憲未嘗不正容及歸罔然若
有失也其母問曰汝復從牛醫兒來邪對曰良不見
叔度不自以爲不及旣覩其人則瞻之在前忽然在
後固難得而測矣同郡陳蕃周舉常相謂曰時月之
間不見黃生則鄙吝之萌復存乎心及蕃爲三公臨
朝歎曰叔度若在吾不敢先佩印綬矣郭林宗少游

汝南先過袁閎不宿而退進往從憲累日方還或以
問林宗林宗曰奉高之器譬諸汎濫雖清而易挹叔
度汪汪若干頃陂澄之不清滄之不濁不可量也年
四十八終天下號曰徵君

○戴良

戴良字叔鸞汝南慎陽人也少誕節母烹驢鳴良常
學之以娛母及母卒良與兄伯鸞同居廬兄啜粥非
禮不行良獨食肉飲酒哀至乃哭而二人俱有毀容
或問良曰子之居喪禮乎良曰然禮所以制情佚也

清苟不佚何禮之論良既才高而論議尚奇多駭俗
同郡謝季孝問曰子自視天下孰可爲比良曰我若
仲尼長東魯大禹出西羌獨步天下無與爲偶舉孝
廉不就再辟司空府不到州郡追之乃遜入江夏山
中以壽終良五女並賢每有求姻踈裳布被竹筥木
屐隨時嫁遣不稱費也五女皆能遵其訓亦有隱者
之風焉

○袁閔

袁閔字夏甫少厲操行徵聘舉召皆不應從父逢囃

並貴盛數饋之皆不受閎見時方險亂對其兄弟歎曰吾先公福祚後世不能以德守之而竟爲驕奢與亂世爭權此卽晉三郤矣延熹末黨事將作閎遂散髮絕世欲投山林以母老乃築土室四周於廷不爲戶自牖納飲食而已母思閎時往就視母去便自掩閉兄弟妻子莫得見也及母歿不爲制服設位時莫能名或以爲狂生潛身八年黃巾賊起攻沒郡縣百姓驚散閎誦經不移賊相約語不入其間鄉人就閎避難者皆得全免閎遂卒於土室勅其子勿設殯棺

但着禪衫疏布單衣幅巾親尸於板牀之上以五百
堅爲藏

○郭泰

郭泰字林宗太原介休人也幼孤母欲使給事縣廷
林宗曰大丈夫焉能處斗筲之役乎就成臯屈伯彥
學三年乃游洛陽始見河南尹李膺大奇之後歸鄉
里衣冠諸儒送至河上林宗唯與李膺同舟而濟衆
賓望之以爲神仙焉或勸之仕對曰吾夜觀乾象晝
察地理人事天之所廢不可支也性明知人好獎訓

士類容貌魁偉嘗於陳梁間行遇雨巾一角墊時人乃故折巾一角以爲林宗巾其見慕皆如此林宗雖善人倫而不爲危言覈論故宦官擅政而不能傷也建寧元年陳蕃竇武爲閹人所害林宗慟哭之於野而歎曰人之云亡邦國殄瘁瞻烏爰止不知于誰之屋明年卒年四十八四方之士千餘人皆來會葬同志者共刻石立碑碑文蔡邕所製也邕嘗謂涿郡盧植曰吾爲碑銘皆有慙德唯郭有道無愧耳左原爲榔學生犯法見斥林宗遇諸路爲設酒肴以慰之曰

昔顏涿聚、梁甫之巨盜，段干木，晉國之大儒，卒爲齊之忠臣。魏之名賢，慎勿恚恨也。茅容陳留人，時與等輩避雨樹下，衆皆夷踞相對，容獨危坐。林宗行見之，遂請寓宿。旦日殺雞，林宗謂爲已設，旣而已，爲母共。而以草蔬飯客。林宗起而拜曰：「卿賢哉，宜勤於學。」孟敏客居太原，荷甕墮地，不顧而去。林宗問之，對曰：「甕已破矣，視之何益？」林宗異之，亦勸令遊學。東垂少給事縣廷，林宗見之，勸遊學宮，遂爲諸生。傭後能講論，自以卑第，每處下坐。諸生博士官咸敬，問由是學中。

以下坐爲貴。濟陰黃允以儻才知名。宗是而謂曰：卿有絕人之才，足成偉器。然恐守道不篤，將失之矣。後司徒袁隗欲爲從女求姻，見允而歎曰：得婿如是足矣。允聞而黜遣其婦夏侯氏。婦謂姑曰：今當長辭乞一會親屬，以展離訣。於是大集賓客，婦中坐攘袂數允隱惡十五事，遂登車去。允以此遂廢。又識張孝仲芻牧之中，知范特祖郵置之役，召公子許偉康並出屠沽司馬子威拔自卒伍，及同郡郭長信、郝禮真等六十人，皆成名於世。

○徐穉

徐穉字孺子、南昌人。時陳蕃爲太守，蕃在郡不接賓客。唯穉來，特設一榻去。則縣之延禧二年，蕃爲尚書令，與僕射胡廣上疏薦穉等曰：臣聞善人天地之紀，政之所由也。伏見豫章徐穉、彭城姜肱、汝南袁閎、京兆韋著、潁川李曇，德行純備。若使擢登二事，協亮天工，必能翼宣盛美，增光日月。桓帝乃以安車、玄纁徵之，並不至。因問蕃曰：徐穉、袁閎、韋著孰爲先後？蕃對曰：閎生，出公族，聞道漸訓，日久著長於三輔禮義之

鄉皆所謂不扶自直不鑿自雕者若徐穉生長江南而角立傑出尤所難也嘗爲太尉黃瓊所辟不就及瓊卒穉負糧徒步往吊之設雞酒祭哭畢遂去郭林宗疑之乃選能言生茅容追及與之設飯羅臨去乃言曰爲我謝林宗大樹將顛非一繩所維何爲栖栖不遑寧處及林宗有母憂穉亦往吊置生芻一束於廬前衆恠之林宗曰此必南州高士徐孺子也詩不云乎生芻一束其人如玉吾何德以堪之

○管寧

此人大用得

管寧字幼安、北海人也、身長八尺、美鬚眉、與平原華歆同縣、邴原俱游學於異國、而並敬善陳仲弓、天下大亂、寧聞公孫度令行海外、遂與原及太原王烈等俱至遼東、度虛館以待寧等、寧乃廬于山谷之間、時避難者多居郡南、寧獨居北、示無還意也、隣人有牛暴寧田、寧爲牽牛着涼處、自與飲食、過于牛主、牛主得牛、大慙、寧所居屯落皆會井、而汲男女混雜、每至爭汲、鬪鬩、寧多買汲器、分置井傍、而先汲水以待來者、來者得而怪之、問知是寧、乃各相悔責、不復鬪訟。

矣黃初四年詔公卿舉篤行君子司徒華歆薦寧曹
不篡位徵寧寧遂將家屬浮海還郡公孫恭送至南
郊加贈服物自寧之東也度子康及孫恭前後貧遺
皆受不讓至是日寧盡封還之卒年八十四初寧妻
先卒知故勸寧更娶寧曰每省曾子王駿之言意常
嘉之豈自遭之而違本心乎

○王烈

王烈字彥方太原人也少師事陳寔以義行稱鄉里
有盜牛者主得之盜請罪曰刑戮自甘乞不使王彥

方知也。烈聞而使人謝之，遺布一端。後有老父遺劔于路，有一人見而守之，至暮，老父還尋得劔，怪之以事告烈。烈使推求，乃先盜牛者也。諸有爭訟，曲直將質之于烈，或至塗而反，或望廬而還，其以德感人若此。察孝廉三府並辟，皆不就。遭黃巾董卓之亂，乃與管寧、邴原避地遼東。夷人尊奉之，太守公孫度接以昆弟之禮。訪州政事，欲以爲長史。烈乃爲商賈自穢，得免。曹操聞烈高名，遣徵不至。建安二十四年，終于遼東。年七十八。

夕
卷五十一
○龐德公司馬徽

二人俱犬用得

龐公者南郡襄陽人也居峴山之南未嘗入城府荊州刺史劉表數延請不屈乃就候之曰夫保全一身孰若保全天下乎龐公笑曰鴻鵠巢于高林之上暮而得所棲黿鼉穴于深淵之下夕而得所宿夫趣舍行止亦人之巢穴也各得其棲宿而已天下非所保也因釋耕隴上而妻子耘于前表指而問曰先生苦居畝畝不冝官祿何以遺子孫乎公曰世人皆遺之以危我獨遺之以安雖所遺不同未爲無所遺也後

遂携其妻子登鹿門山因採藥不反襄陽記曰諸葛孔明每至德公家獨拜床下德公初不令止司馬德操嘗詣德公值其渡沔上先人墓德操徑入其室呼德公妻子使速作黍徐元直向云當來就我與德公談其妻子皆羅拜於堂下奔走共設湏臾德公還直入相就不知何者是客也德操年小德公十歲无事之呼作龐公故俗人遂謂龐公

○張翊

張翊少游太學學兼内外袁紹前後辟命皆不應移

居上黨并州牧高幹表除樂平令亦不就徙遁常山
遷居任縣曹操辟之又不肯詣正始初戴鶯之鳥巢
珩門陰珩告人曰戴鶯陽鳥而巢門陰此凶兆也乃
援琴歌詠作詩二篇旬日卒年一百五歲

○焦光 字孝然

焦光無父母兄弟妻子見漢室衰乃絕口不言及魏
篡位常結草爲廬於河之湄河東太守杜恕嘗以衣
服迎見而不與語司馬景王使安定太守董經因事
過視又不語其後野火燒其廬光遂露寢冬雪大至

光臥不移人以爲歿就視如故後百歲餘乃卒

○李士謙崔廓

李士謙趙郡平棘人博覽羣籍兼善天文術數隋有天下畢志不仕有粟數千石以貸鄉人值年穀不登債家無以償士謙悉召債家爲設酒食對之燔券曰債了矣明年大熟債家爭來償拒之一不受或謂之曰子多陰德矣士謙曰人所不知謂之陰德今吾所爲皆子所知何謂陰德嘗有客不信報應之說士謙喻之曰積善餘慶積惡餘殃非報應之最著者乎崔

久昌傳 卷五十八
廓安平人少孤貧屢爲鄉族所屈辱逃入山中不應
辟命亦與士謙爲忘年之友故時稱崔李焉

○張文詡

張文詡河東人博覽文籍仁壽末州郡頻舉皆不應
從容長歎曰老冉冉而將至嗟修名之不立以如意
擊几而歌

○元德秀

元德秀字紫芝河南人少孤事母孝舉進士不忍去
左右自負母入京師旣擢第母亡遂不娶以兄之子

爲嗣兄子方在襁褓無資得乳媪德秀自乳之數日
漣流能食乃止家苦貧出爲魯山令玄宗在東都酺
五鳳樓下命三百里內縣令刺史各以聲樂集河內
太守輦優妓數百被錦繡或作犀象環譎光麗德秀
惟樂工數人連袂歌于薦于薦者德秀所爲歌也帝
聞而異之歎曰賢人之言哉乃黜河內太守而德秀
於是知名然非其好也歲餘駕柴車去隱陸渾山中
不爲牆垣扃鑰家無僕妾日或不爨唯飲酒彈琴以
自娛而已房琯見而歎曰見紫芝眉宇使人名利之

心都盡蘇源明嘗語人曰吾不幸生衰俗猶幸識元紫芝也

○鄭遨李道殷羅隱之

鄭遨白馬人唐昭宗時舉進士不中見天下已亂有拂衣遠去之意欲携其妻子俱隱妻不從遨乃入少室山爲道士其後徙居華陰與道士李道殷羅隱之友善遨種田隱之賣藥道殷有釣魚術又能化石爲金遨嘗驗其信然而不之求也唐明宗時以左拾遺召晉高祖時以諫議大夫召皆不起

○南安翁

漳州陳元忠客居南海日赴省試過南安會日暮投宿翁家茅茨數椽竹樹茂密可愛時人稱曰南安翁竟不知其名誰也翁雖麻衣草履而舉止談對宛若士人几案間有文籍視之皆經子陳忽叩之曰翁訓子讀書乎曰種園爲生耳亦入城市乎曰十五年不出矣少焉二子歸捨鋤揖客翁進豆羹享客不復共談遲明別去陳以事留城中翌日見翁倉皇而行陳追詰之曰翁云十五年不入城何爲到此曰吾以急

事問之、乃大兒於關外鬻果失稅、爲關吏所拘、捕送郡、翁與小兒偕詣庭下、長子當杖、翁懇白、郡守曰、某老鈍無能、全藉此子贍給、若渠不勝杖、則翌日乏食矣、願以身代之、小兒曰、大人豈可受杖、某願代兄、三人爭不決、小兒來父耳旁語、若將有所請、翁叱之、郡守疑之、呼問所以、對曰、大人元係帶職、正郎宜和問累典州郡、守詢詰勅在否、兒曰、見作一束、寘甕中、埋於山下、守立遣吏隨兒發取、果得之、卽延翁上坐、禮謝之、而釋其子、次日枉駕訪之、室已虛矣、

○蘇雲卿

蘇雲卿廣漢人紹興間來豫章東湖結廬以居待隣曲甚有恩禮以故無良賤老穉皆愛敬之稱之曰蘇翁焉身長七尺美須髯無疾病披荆畚礫爲圃藝樹耘芟灌溉培壅皆有法度雖隆暑極寒土焦草凍圃不絕蔬滋鬱暢茂四時之品無闕者又不二價市鬻者利倍而售速夜織屨堅韌過革屨人爭買之是以薪米不乏既園之隙閉門高臥或危坐終日莫測識也少與張浚爲布衣交浚爲相馳書函金幣屬豫章

帥及漕曰余鄉人蘇雲卿管樂流亞遁迹湖海有年矣近聞灌園東湖其高風偉節非折簡能屈幸親造其廬必爲我致之帥漕密物色曰此獨有灌園蘇翁無雲卿也帥漕乃屏騎從更服爲游士入其圃翁運鋤不顧進而揖之翁曰二客何從來也延入室土銚竹几地無纖塵案上有西漢書二冊二客恍若自失默計此爲蘇雲卿也旣而汲泉煮茗意稍款洽遂扣其鄉里徐曰廣漢客曰張德遠廣漢人翁當識之曰然客又問德遠何如人曰賢人也第長于知君子短

手。知小人德有餘而才不足。因問德遠今何官。二客曰。今朝廷起張公欲了此事。翁曰。此恐怕他未便了。得在二客起而言曰。張公令其等致公共濟大業。因出書函金帛。真几上。力請與之共載雲卿。辭以詰朝。上謁及期。遣使迎伺。則扃戶閒然。排闥入。則書幣不啓。家具如故。而翁已遁矣。

藏書外臣傳身隱門目錄卷五十九

莊周列禦寇

○四皓

嚴遵

鄭樸

向長禽慶

○野王二老

嚴光

井丹

閔仲叔荀恁

○朱葛高恢

高鳳

○朱葛

矯慎馬瑤

○朱葛

周勰

○朱葛

寒貧子

孫登

陶潛

宗測

阮孝緒

李謐

翟法賜

朱桃椎

武攸緒

卷之五

卷之五

卷之五

卷之五

陸寧

孔淳之

臧榮緒

孫思邈

崔觀

○楊王孫附

陸龜蒙

司空圖

○陳搏

邵雍

別見

魏野

林逋

張璪

○順昌山人

劉因

藏書外臣傳身隱門目錄卷五十九

藏書外臣傳卷五十九

○身隱

○莊周 ○附列禦寇

莊子者，蒙人也。名周。周嘗爲蒙漆園吏。與梁惠王、齊宣王同時。其學無所不闕。然其要本歸于老子之言。故其著書六萬餘言，大抵率寓言也。作漁父、盜跖、胠篋，以詆訛孔子之徒，以明老子之術。畏累虛、亢桑子之屬，皆空語無事實。然善屬書，離辭指事，類情用剽剝。儒墨雖當世宿學，不能自解免也。其言洸洋自恣。

適已故自王公大人不能器之。楚威王聞莊周賢使
厚幣迎之許以爲相。莊周笑謂楚使者曰：「千金重利
卿相尊位也。子獨不見郊祭之犧牛乎？養食之數歲
衣以文繡以入太廟。當是之時雖欲爲孤豚豈可得
乎？亟去無污我。我寧遊戲污瀆之中自快無爲有國
者所羈。終身不仕以快吾志焉。」

列禦寇鄭人問道於關尹子。復師壺丘子林。老商氏
友伯高子。隱居鄭圃四十年無知者。著書行于世。劉
向曰：「列子與鄭繆公同時。蓋有道者也。其學本於黃

帝老子號曰道家孝景皇帝時貴黃老術此書頗行于世及後遺落散在民間未有傳者且多寓言於莊周相類故太史公司馬遷不爲列傳謹第錄臣向昧死上

○四皓

四皓者河內軹人也或在汲一曰東園公二曰角里先生三曰綺里季四曰夏黃公皆修道潔已非義不動秦始皇時見秦政虐乃退入藍田山作歌曰莫莫高山深谷逶迤曄曄紫芝可以療饑唐虞世遠吾將

何歸駟馬高蓋其憂甚大富貴而畏人不如貧賤之肆志乃共入商雒隱地肺山不仕秦亦不仕漢

○嚴遵

嚴遵字君平蜀人常賣卜於成都日得百錢以自給
卜訖則閉肆下簾以著書爲事楊雄少從之遊屢稱
其德蜀有富人羅冲者問之曰君何以不仕君平曰
無以自發冲爲具車馬衣糧君平曰吾病也非不足
也我有餘而子不足奈何以不足奉有餘冲曰吾有
萬金子無儋石何云有餘君平曰不然吾前宿子家

人定而役未息晝夜汲汲未嘗有足今吾以卜爲業
不下牀而錢自至猶餘數百塵埃厚寸不知所用此
非我有餘而子不足邪君平因歎曰益我貨者損我
神生我名者殺我身

○鄭樸

鄭樸字子真谷口人修道靜默成帝時元舅大將軍
王鳳以禮聘之不至楊雄盛稱其德曰谷口子真躬
耕巖石之下而名振京師

○同長禽慶

不事莽

向長字子平、河內朝歌人、隱居不仕、性尚中、和、嘗讀
易至損益卦、喟然嘆曰、吾已知富不如貧、貴不如賤、
但未知死何如生耳、建武中、男女娶嫁既畢、敕斷家
事、勿相關白、當如我死也、於是遂肆意、與同好北海
禽慶子夏俱遊五嶽名山、莫知所終、

○野王二老

野王二老者、不知何許人也、初光武貳於更始、會關
中擾亂、光武送鄧禹西征、既反、因於野王獵、路見二
老、舉手西指曰、此中多虎、臣每卽禽、虎亦卽臣、大王

勿往也。光武曰：苟有其備，虎亦何患？父曰：何大王之謬邪？昔湯卽桀於鳴條，而大城於亳；武王亦卽紂於牧野，而大城於郊。彼二王者，其備非不深也。是以卽人者，人亦卽之。雖有其備，庸可忽乎？光武悟其旨，顧左右曰：此隱者也。將用之，辭而去，莫知所在。

○嚴光

嚴光字子陵，餘姚人也。少與光武同遊學，及卽位，乃變名姓，隱身不見。帝思其賢，令以物色訪之。後齊國上言：有一男子，披羊裘釣澤中。帝疑是光，乃備安車。

玄纁遣使聘之。三反而後至。司徒族霸與光素舊。遣使奉書。因謂光曰。聞先生至。欲卽詣造。迫於典司。是以不獲願。因日暮。自屈語言。光不荅。投札與之。口授曰。君房足下。位至鼎足。甚善。懷仁輔義。天下悅。阿諛順旨。要領絕霸。得書。封奏上。帝笑曰。狂奴故態也。車駕卽日幸其館。光臥不起。帝卽其臥所。撫光腹曰。咄。咄子陵。不可相助爲理邪。光又眠不應。良久。乃張目熟視曰。昔唐堯著德。巢父洗耳。士故有志。何至相迫乎。帝曰。子陵。我竟不能下女邪。於是升輿。嘆息而去。

復引光入論道舊故相對累日帝從容問光曰朕何如昔對曰差增於往因共偃臥光以足加帝腹上明日太史奏客星犯御坐甚急帝笑曰朕故人嚴子陵共臥耳除爲諫議大夫不屈去耕釣於富春山故後人名其釣處爲嚴陵瀨建武十七年復特徵不至年八十終于家帝傷悼之詔下郡縣賜錢百萬穀千斛

○井丹

井丹字大春扶風郿人也少受業太學通五經善談論故京師爲之語曰五經紛綸井大春性矜高未嘗

修刺候人似早老建武末沛王輔等五王居北宮好賓客更遣使要丹皆不能致信陽侯陰就者光烈皇后弟也以外戚貴盛乃詭說五王求錢千萬約致丹而別使人要劫之丹不得已而至既至就故爲設麥飯葱菜之食丹推去之曰以君侯能供甘旨故來相過何其薄乎更致盛饌乃食及就左右進輦丹笑曰吾聞桀駕人車豈此邪一坐皆失色就不得已令去輦丹自是隱閉不關人事以壽終

○閔仲叔荀恁

太原閔仲叔者世稱節士雖周黨之潔清自以弗及也黨見其含菽飲水遺以生蔬受而不食建武中應司徒侯霸之辟既至霸不及政事徒勞苦而已仲叔曰始蒙嘉命且喜且懼今見明公喜懼皆去以仲叔爲不足問邪不當辟也辟而不問是失人也遂投劾而去客居安邑老病家貧不能得肉日買猪肝一片屠者或不肯與安邑令聞知敕吏常給焉仲叔歎曰閔仲叔豈以口腹累安邑邪遂去客沛以壽終仲叔同郡荀恁字君大亦修清節資財千萬悉散與九族

隱居山澤王莽末匈奴寇廣武聞恁名節相約不入
荀氏間光武徵以病不至永平初東平王蒼爲驃騎
將軍辟而應焉及後朝會顯宗戲之曰先帝徵君不
至驃騎辟君而來何也對曰先帝秉德以惠下故臣
可得。不來驃騎執法以檢下故臣不敢不至。月餘罷
歸卒于家

○梁鴻高恢

梁鴻字伯鸞扶風人受業太學學畢乃牧豕於上林
苑中誤失火延及它舍鴻尋訪燒者問所去失悉以

豕償之其主猶以爲少鴻曰無它財願以身居作因
爲執勤不懈鄰家耆老見鴻非恒人乃共責讓主人
而稱鴻長者於是悉還其豕鴻不受而去旣歸鄉里
勢家慕其高節多欲女之鴻並不娶同縣孟氏有女
狀肥醜而黑力舉石曰擇對不嫁至年三十父母問
其故女曰欲得賢如梁伯鸞者鴻聞而聘之女求作
布衣麻縷織作筐緝績之具及嫁始以裝飾入門七
日而鴻不荅妻跪請曰竊聞夫子高義簡斥數婦妾
亦偃蹇數夫矣今而見擇敢不請罪鴻曰吾欲裘褐

之人可與俱隱深山者爾今乃衣綺縞傅粉墨豈鴻
所願哉妻曰以觀夫子之志耳妾自有隱居之服乃
更爲椎髻着布衣操作而前鴻大喜曰此真梁鴻妻
也能奉我矣字之曰德曜名孟光居有頃妻曰嘗聞
夫子欲隱居避世今何爲默默無乃欲低頭就之乎
鴻曰諾乃共入霸陵山中以耕織爲業詠詩書彈琴
以自娛仰慕前世高士爲四皓以來二十四人作頌
因東出關過京師作五噫之歌曰陟彼北芒兮噫顧
覽帝京兮噫官室崔嵬兮噫人之劬勞兮噫遼遼未

央兮噫肅宗聞而非之鴻乃易姓運期名耀字侯光
與妻子居齊魯之間有頃又去適吳將行作詩云云
遂至吳依大家臯伯通居廡下爲人賃舂每歸妻爲
具食不敢於鴻前仰視舉案齊眉伯通察而異之曰
彼傭能使其妻敬之如此非凡人也乃舍之於家鴻
潛閉著書十餘篇疾且困告主人曰昔延陵季子葬
子于贏博之間不歸鄉里慎勿令我子持喪歸去及
卒伯通等爲求葬地於吳要離冢傍咸曰要離烈士
而伯鸞清高可令相近初鴻友人京兆高恢少好老

烈士乎

且知鴻其

子隱華陰山中及鴻東遊思恢作詩曰鳥嬰嬰兮友
之期念高子兮僕懷思想念恢兮爰集茲二人遂不
復相見恢亦高抗終身不仕

○高鳳

高鳳字文通南陽葉人也家以農畝爲業而鳳專精
誦讀晝夜不息妻嘗之田曝麥於庭令鳳護雞時天
暴雨而鳳持竿誦經不覺潦水流麥妻還怪問乃覺
故其後遂爲名儒焉敎授西唐山中鄰里有爭財者
持兵而鬪鳳往解之不已乃脫巾叩頭固請曰仁義

遜讓奈何棄之於是爭者懷感投兵謝罪。鳳年老執志不倦名聲著聞。太守連召請恐不得免。自言本巫家不應爲吏。又詐與寡嫂訟田。遂得不仕。

○臺佟

臺佟字孝威。魏郡鄴人也。隱于武安山鑿穴爲居。採藥自業。建初中。州辟不就。刺史行部使從事致謁。佟載病往謝。刺史乃執贄見佟。曰。孝威居身如是。甚苦奈何。佟曰。佟幸得保全性命。存神養和。如明使君奉宣詔書。夕惕庶事。反不苦邪。遂去。終不見。

夕月仙
卷三十九
○矯慎馬瑤

矯慎字仲彥扶風茂陵人少學黃老隱遯山谷因穴
爲室仰慕松喬導引之術與馬融蘇章鄉里並時融
以才博顯名章以廉直稱然皆推慎先之年七十餘
竟不娶後忽歸家自言歿日及期果卒後人有見慎
於敦煌者慎同郡馬瑤亦隱於沂山以兔罟爲事所
居俗化百姓美之號馬牧先生焉

○樊英

樊英字季齊魯陽人少受業三輔習京氏易兼明五

經又善風角星筭河洛七緯推步灾異隱於壺山之陽受業者四方而至州郡前後禮請不應公卿舉賢良方正有道皆不行嘗有暴風從西方起英謂學者曰成都市火甚盛因含水西向漱之乃令記其日時客後有從蜀來云是日大火有黑雲卒從東起須臾大雨火遂得滅安帝初徵爲博士至建光元年復詔公車賜策書徵英不至永建二年順帝策書備禮玄纁徵之復固辭疾篤乃詔切責郡縣駕載上道英不得已到京稱病不肯起強輿入殿猶不以禮屈帝怒

之而敬其名使出就太醫養疾月致羊酒至四年三月天子乃爲英設壇席令公車令導尚書奉引賜几杖德以師傅之禮延問得失英不敢辭拜五官中郎將數月英稱疾篤弗聽英初被詔命僉以爲必不降志石後應對又無奇謨深策談者以爲失望河南張楷與英俱徵謂英曰天下有二道出與處也吾前以子之出能輔是君也濟斯人也而子始以不訾之身怒萬乘之主及其享受爵祿又不聞匡救之術進退無所據矣此未可以病英也英旣善術朝廷每有灾

異詔輒下問變復之效所言多驗潁川陳寔少從英學嘗有疾妻遣奴婢拜問英下牀荅拜寔怪而問之英曰妻齊也共奉祭祀禮無不荅其恭謹如是年七十餘卒於家 樊英善藏其用

范曄論曰漢世之所謂名士者其風流可知矣雖弛張趣舍時有未純於刻情修容依倚道藝以就其聲價一也樊英楊厚初徵朝廷待若神明至竟無它異英名最高毀最甚李固朱穆等以爲處士純盜虛名無益於用是也然而後進希之以成名世主禮之以

得衆原其無用亦所以爲用則其有用或歸於無用
矣何以言之夫煥乎文章時或乖用本乎禮樂適未
或疎及其陶摺紳藻心性使由之而不知者豈非其
道邈遠出於常用之表不可以數跡求乎而或者忽
不踐之地賒無用之功至乃誚譟禮樂謂遠術賤斥
國華謂獨善以爲方詐可以救淪敝文律足以致寧
平智盡於猜察道足於法令雖濟萬世不足以喜其
將與夷狄同乎

○周勰

周勰字巨勝光祿大夫舉之子而陳畱太守防之孫也少以父任爲郎自免歸父故吏河南召夔爲郡將卑身降禮以事勰勰恥交報之因杜門自絕後太守舉孝廉復以疾辭時梁冀貴盛被其徵命者莫敢不應唯勰前後三辟竟不屈後舉賢良方正亦不應又公車徵玄纁備禮固辭廢疾隱處竄身杜絕人事門巷生荆棘者十餘年至延熹二年乃開門延客游談宴樂及秋而冀誅年終而勰卒蔡邕以爲知命云自勰曾祖父揚至勰孫恂六世一身皆知名

○法真

法真字高卿扶風郿人南郡太守雄之子也好學而無常家博通內外圖典爲關西大儒性恬靜寡欲不交人事太守請見之真乃幅巾詣謁太守曰昔魯哀公雖爲不肖而仲尼稱臣太守虛薄欲以功曹相屈光贊本朝何如真曰以明府見待有禮故敢自同賓末若欲吏之真將在北山之北南山之南矣太守懼然不敢復言友人郭正稱之曰法真名可得聞身難得見逃名而名我隨避名而名我追可謂百世之師

矣乃共刊石頌之號曰玄德先生年八十九中平五年以壽終

○寒貧子

寒貧子建安初客三輔至十六年關中大亂乃南入漢中及漢中破隨衆還長安居窮巷小屋行乞以自給富貴人饋遺之皆不受因號曰寒貧子云

○翟莊

翟莊潯陽人少以弋釣爲事及長不復弋或問漁獵同是害生之事而先生止去其一何哉莊曰獵自我

釣自物未能殫盡故先節其甚者且夫貪餌吞釣豈我哉時人以爲知言晚節亦不復釣端居華門命徵並不就

○孫登

孫登字公和汲郡共人也無家屬於郡北山爲土窟居之夏則編草爲裳冬則被髮自覆好讀易撫一弦琴見者皆親樂之性無恙怒人或投諸水中欲觀其怒登旣出便大笑時時游人間所經家或設衣食受而去皆捨棄人與語不應文帝聞之使阮籍往觀旣

見與語亦不應嵇康又從之游三年問其所圖終不
答康將別謂曰先生竟無言乎登乃曰子識火乎火
生而有光而不用其光果在于用光人生而有才而
不用其才果在于用才故用元在乎得薪所以保其
耀用才在乎識真所以全其年今子才多識寡難乎
免于今之世矣

○皇甫謐 ○附楊王孫

皇甫謐字士安安定朝那人漢太尉嵩之曾孫也出
後叔父徙居新安年二十猶不好學游揚無度或以

爲癡嘗以所得瓜果進所後叔母任氏任氏曰孝經云三牲之養猶爲不孝汝今年餘二十目不存教心不入道何以慰我因歎曰昔孟母三徙成仁曾父烹豕存教豈我居不卜鄰教有所闕何爾魯鈍之甚也修身篤學自汝得之於我何有因對之流涕謚於是感激遂去就鄉人席坦受書居貧帶經而農博綜典籍百家之言始有高尚之志專以著述爲務矣自號玄晏先生著禮樂聖真之論後得風痺疾猶手不輟卷或勸謚修名廣交者謚以爲非聖人孰能兼存出

處居田里之中亦可以樂堯舜之道何必崇接世利
事官執掌然後爲名乎作玄守論以荅之曰或謂謚
曰富貴人之所欲貧賤人之所惡何故委形待終窮
而不變也且道之所貴者理世也人之所美者及時
也先生年邁齒變飢寒不贍不過轉歿溝壑而已矣
謚荅之曰人之所至惜者命也所必全者形也所不
可犯者病也若擾全道以損性命安在其爲得所欲
哉吾聞食人之祿者懷人之憂形強猶不堪况乎弱
且病也且貧者士之常賤者道之實處常得實沒齒

不憂又孰與富貴而擾神耗精者歟夫生爲人所不知歿爲人所不惜至矣暗聾之徒天下之有道者也故一人歿而人皆號者以爲損也一人生而人皆笑者以爲益也然則號笑又何損益於歿生也是以至道不損至德不益夫唯無損則至堅矣夫唯無益則至厚矣堅故終不損厚故終不薄苟能體堅厚之實居不薄之真立乎損益之外游乎形骸之表則我全矣遂不仕耽玩典籍忘其寢食時人謂之書淫焉城陽太守梁柳謚從姑子也當之官或勸謚錢之謚曰

柳爲布衣時過吾吾送迎不出門食不過鹽菜今作
郡而送之是貴城陽太守而賤梁柳非吾所安也時
魏郡召上計掾舉孝廉景元初相國辟皆不行武帝
頻下詔敦逼不已謚上疏自稱草莽臣辭切言至遂
見聽歲餘又舉賢良方正不起自表就帝借書帝送
一車書與之謚初服寒食散性與之忤每委頓不倫
嘗悲恚叩刃欲自殺濟陰太守文立表以命士有贊
爲煩請絕其禮幣詔從之謚聞而歎曰亡國之大夫
不可與圖存信哉夫束帛淺易之明美玄纁之贊

自古之舊也故孔子稱夙夜強學以待問席上之珍
以待聘士於是乎三揖乃寢明致之難也一讓而退
明去之易也若殷湯之於君六文王之於太公或身
卽莘野或就載以歸唯恐農之不重豈吝其煩費哉
且一禮不備貞女恥之況命士乎政之失賢於此乎
在矣著論爲葬送之制名曰篤終曰玄晏先生以爲
人之所貪者生也所惡者歿也雖貪不得越期雖惡
不可逃遁人之歿也精歇形散魂無不之故氣屬於
天寄命終盡窮體反真故尸藏於地是以神不存體

與氣升降尸不久寄與地合形形神不隔天地之性也尸與土并反真之理也今生不能保七尺之軀死何故隔一棺之土然則衣衾所以穢尸棺槨所以隔真故桓司馬石槨不如速朽季孫璵璠比之暴骸文公厚葬春秋以爲華元不臣楊王孫親土漢書以爲賢於秦始皇如令魂必有知則人鬼異制黃泉之親灰多於生必將備其器物用待亡者今若以存況終非卽靈之意也如亡無知則空奪生用損之無益是招露形之禍增亡者之毒也夫葬者藏也藏也者欲人

之不得見也、而大爲棺槨、備贈存物、無異於埋金路隅、而書表於上也、雖甚愚之人、必將笑之、豐財厚葬、以啓姦心、或剖破棺槨、或牽曳形骸、或剝臂將金環、或捫膈求珠玉、焚如之形、不痛於是矣、易稱古之葬者、衣之以薪、葬之中野、不封不樹、是以歿得歸真、亡不損生、吾本欲露形入院、以身親土、或恐人情染俗、來久、頃革理難、令故桶爲之制、奢不石槨、儉不露形、氣絕之後、遽蔭裹尸、置尸牀上、舉床就阬、去床下尺、便以親土、上與地平、還其故草、無種樹木、無居墓次、

夫古不崇墓智也。今之封樹愚也。若不從此是戮尸
地下。歿而重傷魂。而有靈則冤悲沒世。長爲恨鬼。王
孫之子。可以爲誠。歿誓難違。卒無改焉。太康三年卒。
年六十八。子童靈方回等。遵其遺命。謚所著詩賦誄
頌論難甚多。又撰帝王世紀。年歷高士逸士列女等
傳。玄晏春秋。並重於世。門人摯虞張軌牛綜席純皆
爲晉名臣。

楊王孫者。孝武時人也。學黃老之術。家業千金。厚自
奉養。亡所不致。及病且終。先令其子曰。吾欲羸葬。以

反吾真必止易吾意歾則爲布囊盛之尸入地七尺
旣下從足引脫其囊以身親土其子欲默而不從重
廢父命欲從之又不忍廼往見王孫友人祁侯祁侯
與王孫書曰竊聞王孫先令羸葬令成者無知則已
若其有知是戮尸地下將羸見先人竊謂爲王孫不
取也且孝經曰爲之棺槨衣衾是亦聖人之遺制何
必區區獨守所聞乎王孫報曰蓋聞古之聖王緣人
情不忍其親故爲制禮今則越之吾是以羸葬將以
矯世也夫厚葬誠無益於死者而俗人競以相高靡

財單幣腐之地下、或乃今日入而明日發、此真與暴骸於中野何異、且夫歿者終生之化、而物之歸者也。歸者得至化者、得變是物各反其真也。反真、真亡、形亡、聲廼合道情。夫飾外以華衆、厚葬以鬲真、使歸者不得至化者、不得變、是使物各失其所也。且吾聞之精神者、天之有也。形骸者、地之有也。精神離形、各歸其真、故謂之鬼。鬼之爲言、歸也。其尸塊然獨處、豈有知哉。裹以幣帛、鬲以棺槨、肢體絡束、口含玉石、欲化不得、鬱爲枯腊、千載之後、棺槨朽腐、乃得歸土、就

其真宅由是言之焉。用久客。昔帝堯之葬也。窆木爲
匱。葛藟爲緘。其穿下不亂泉。上不泄壤。故聖王生易
尚。歿易葬也。不加功於無用。不損財於無謂。今費財
厚葬。畱歸。鬲至。歿者不知生者。不得是謂重惑於戲
吾不爲也。祁侯曰。善。遂羸葬。

○晉陶潛

陶潛字元亮。大司馬侃之曾孫也。祖茂。武昌太守。潛
少懷高尚。博學善屬文。穎脫不羈。任真自得。爲鄉鄰
所貴。嘗著五柳先生傳以自況。曰。先生不知何許人。

也不詳姓字宅邊有五柳樹故因以爲號焉閒靜少
言好讀書不求甚解每有會意欣然忘食性嗜酒而
家貧不能恒得親舊知其如此或置酒招之造飲必
盡期在必醉環堵蕭然短褐穿結簞瓢屢空晏如也
常著文章自娛頗示已志忘懷得失以此自終其自
序如此時人謂之實錄以親老家貧起爲州祭酒不
堪吏職少日自解歸年四十復謂親朋曰聊欲絃歌
以爲三逕之資可乎執事者聞之以爲彭澤令縣有
公田悉令種秫曰令吾常醉於酒足矣家人固請種

杭乃以二頃五十畝種秣五十畝種杭久之郡遣督郵至縣吏白應束帶見之潛歎曰吾不能爲五斗米折腰拳拳事鄉里小兒卒賦歸去來辭解印綬去在縣僅八十日杭既不熟秣亦不收也後徵著作郎不就元熙中刺史王弘臨江州嘗詣潛潛稱疾不見因語人曰我性不狎世因疾守閒而已初非潔志慕聲豈敢以王公紆軫爲榮邪弘後知潛當往廬山遣其故人龐通之齎酒具先於半道要潛潛比遇便引酌弘乃出與相聞遂歡宴窮日弘見潛履穿顧左右爲

造履左右請履度潛便於坐伸脚令度履弘復要潛
至州問其所乘潛曰素有脚疾向乘籃輿乃令門生
二兒共輿之至州言笑賞適不覺有異也初顏延之
爲劉抑後軍功曹在潯陽與潛情款後爲始安郡經
過潯陽日造潛飲臨去畱錢二萬潛悉令送至酒家
九月九日出宅邊菊叢中坐摘菊盈把忽弘使送酒
至便就酌貴賤造之者有酒輒設潛若先醉便語客
曰我醉欲眠卿可且去郡將常候之值潛釀熟取頭
上葛巾漉酒漉畢還着其大致如此時周續之入廬

山事釋惠遠彭城劉遺民亦遁迹此山潛又不應徵
命故時謂爲潯陽三隱後刺史檀韶請續之與學士
祖企謝景夷三人共在城此講禮加以雙校所住公
廡近於馬隊潛賦詩曰周生述孔業祖謝響然臻馬
隊非講肆校書亦已勤蓋訊之也潛氣豪一世而沉
潛不露其妻翟氏亦安勤苦與之同志嘗於夏月高
臥北窓清風颯至自謂羲皇上人性不解音但畜無
絃素琴每朋會則撫而和之曰但識琴中趣何勞絃
上聲以宋元嘉四年卒年六十三世號靖節先生亦

未爲深知先生也。時廬山釋慧遠結社東林。秘書丞謝靈運於山後鑿二池植白蓮。呼曰蓮社。潛與慧遠素爲方外交而不與蓮社之列。一日過慧遠甫及寺聞鍾聲不覺顰容遽命返駕。故法眼禪師晚叅示衆云。今夜聞鍾鳴復來有何事。若是陶淵明攢眉却迴去。此法眼特爲陶公揄揚也。慧遠持戒精嚴送客遠者不過虎溪。一日偕潛及簡寂觀主陸修靜不覺過虎溪數百步乃相與大笑而別。好事者遂作三笑圖以紀之。蕭統云。淵明文章不羣詞彩精拔跌宕即彰

獨超衆類、抑揚爽朗、莫之與京、橫素波而旁流、干青雲而直上、語時事則指而可想、論懷抱則曠而且真、加以貞志不休、安道苦節、自非大賢篤志、與道污隆孰能如是乎、蘇軾曰、所貴於枯淡者、謂外枯而中膏、似淡而實美、淵明子厚之流是也、若中邊皆枯、亦何足道、黃庭堅曰、寧律不諧、不使句弱、用字不工、不使語俗、此庾信之所長也、然有意於爲詩也、至於淵明、則所謂不煩繩削而自合者、雖然、巧於斧斤者多疑其拙、窘於檢括者輒病其放、淵明之詩、要當與一丘

一壑者共之耳文選五臣注云淵明詩晉所作者皆題年號入宋所作但題甲子意者恥事二姓故以異之耶此知潛矣抑未謂深知潛也耶當俟如潛者辨之

○陶弘景

陶弘景字通明丹陽秣陵人也初弘景母郝氏夢兩天人手執香爐至其所已而有娠以宋孝建三年戊申歲夏至日生幼有異操年四五歲恒以荻爲筆畫灰中學書至十歲得葛洪神仙傳晝夜研尋便有養

生之志謂人曰仰青雲覩白日不覺爲遠矣及長身長七尺七寸神儀明秀朗目踈眉細形長額聳耳耳中各有七十餘毛出外二寸許右膝有數十黑子作七星文讀書萬餘卷一事不知以爲深恥善琴棋工草隸弱冠齊高帝作相引爲諸王侍讀除奉朝請雖在朱門影不交外物唯以披閱爲務朝儀故事多所取正家貧求宰縣不遂永明十年脫朝服掛神武門上表辭祿詔許之賜以束帛勅所在月給茯苓五斤三密二升以供服餌於是止于句容之句曲山恒曰

此山下第八洞天名金陵華陽之洞周回一百五十里昔漢有咸陽三茅君得道來掌此山故謂之茅山乃中山之館也自號華陽陶隱居人間書札卽以隱居代名徧歷名山尋訪仙藥身旣輕捷性愛山水每經澗谷必坐臥其間吟詠盤桓不能已已謂門人曰吾見朱門廣廈雖識其華樂而無欲往之心望高巖瞰大澤知此難立止自恒欲就之且永明中求祿得輒差舛若不爾豈得爲今日之事豈惟身有仙相亦緣勢使之然永元初更築三層樓已處其上弟子居

其中賓客至其下與物遂絕本便馬善射晚皆不爲
唯聽吹笙而已性愛松風庭院皆植松每聞其響欣
然爲樂有時獨游泉石望見者以爲仙人好著述尚
奇異顧惜光景老而彌篤尤明陰陽五行風角星筭
山川地理方圓產物醫術本草帝代年歷又嘗造渾
天象高三尺許地居中央天轉而地不動以機動之
悉與天相會云修道所須非止天官書也用是深慕
張良爲人云古賢無比齊末爲歌曰水丑木爲梁字
及梁武議禪代弘景援引圖讖數處皆成梁字令弟

子進之武帝既早與之游卽位後恩禮愈篤書問不絕弘景既得神符秘訣以爲神丹可成而苦無藥物帝給黃金朱砂曾青雄黃等後合飛丹色如霜雪服之體輕帝服飛丹有驗益敬重之使造年歷至己巳歲特加朱點實太清三年也帝手敕招之錫以鹿皮巾後屢加禮聘並不出唯畫作兩牛一牛散放水草之間一牛着金籠頭有人執繩以杖驅之武帝笑曰此人欲毀曳尾之龜矣每有吉凶征討大事無不諮詢月中常有數信時人謂爲山中宰相天監四年移

居積金東澗自隱處四十年許年逾八十而有壯容
仙書云眼方者壽千歲弘景末年一眼有時而方修
本草遇神仙桓闔謂曰君之陰功極著以所修本草
用蟲虫水蛭葦爲藥功雖及人而害物命以此一紀
後方得解形大同二年卒時年八十五顏色不變屈
伸如常香氣累日氛氲滿山詔贈太中大夫謚曰貞
白先生弘景妙解術數逆知梁祚覆沒預制詩云夷
甫任誕散平叔坐論空豈悟昭陽殿遂作單于宮大
同末人士競談玄理不習武事後侯景篡果在昭陽

殿初弘景母夢青龍無尾自巳升天弘景果不娶無
子所著其秘密不傳及撰而未訖又十部唯弟子得
之

○宗測

宗測字敬微宋徵士炳之孫也少靜退不樂人間嘗
歎曰家貧親老不擇官而仕先哲以爲美談余竊有
惑但當用天道分地利孰能食人厚祿憂人重事乎
量■而進松木度形而衣薜蘿淡然已足又復何求
平生善易老續皇甫謐高士傳三卷

○馬樞

馬樞扶風人也博極經史尤善佛經周易梁邵陵王綸爲南徐州刺史素聞其名引爲學士綸時自講大品經令樞講維摩老子周易道俗聽者二千人尋遇疾景之亂綸舉兵援臺乃留書三萬卷付樞樞肆志尋覽殆將周遍乃喟然歎曰吾聞貴爵位者以巢由爲桎梏愛山林者以伊呂爲管庫束名實則芻芥柱下之言翫清虛則糠粃席上之說稽之篤論亦各從其好也乃隱于茅山目精洞黃能視閭中物有白燕

一雙巢其庭樹馴狎欄廡時至几案春來秋去幾三十年

○阮孝緒

阮孝緒尉氏人自幼沉靜恒以穿池築山爲樂年十五冠而見其父彥之彥之曰三加彌尊人倫之始宜思自勗以庇爾躬荅曰願迹松子於瀛海追許由於穹谷庶保促生以免塵累自是屏居一室非定省未嘗出戶家人罕見其面天監中屢薦召不出著高隱傳上自炎皇終於天監末分爲三品言行超逸名氏

弗傳爲上篇始終不耗姓名可錄爲中篇挂冠人世
栖心塵表爲下篇外兄王晏貴顯屢至其門孝緒度
其必至顛覆聞其笊管穿籬逃匿鄱陽忠烈王妃孝
緒姊也王嘗欲就見孝緒鑿垣而逃曰我本不應爲
王侯姻戚

○睦亨

睦亨少有大度不拘小節好飲酒與崔浩相友善浩
爲司徒奏徵爲中郎辟疾不赴浩乃投詔書與亨亨
不肯受曰桃簡卿已爲司徒何足以此勞國士乎桃

簡浩小名也。及浩誅，夸爲素服。經時乃止，歎曰：「崔公旣歿，誰能更容哇夸，遂作朋友篇。」

○李謐

李謐，趙郡人也。年十三，通孝經、論語、毛詩、尚書、鄉黨，皆以神童稱。年十八，受業於博士孔璠，每曰：「丈夫擁書萬卷，何假南面百城。」遂絕跡下幃，杜門却掃，棄座營書，手自刪削。公府辟召，皆不就。時黃門侍郎甄琛內贊近機，有親識求官者，琛荅之曰：「諸君獨不見趙郡李謐乎？耽學守道，不悶於時。君等何爲輕自媒衒？」

又謂其子曰昔鄭玄盧植不遠數千里詣扶風馬融
師事之今李先生在邇何不往就業也又謂朝士曰
甄琛行不媿時但未薦李謐以此負國耳

○孔淳之

孔淳之性好山水每有所游必窮幽峻或旬日忘歸
嘗游山遇沙門釋法崇因留共止遂停三載會稽太
守謝方明苦要之不肖往使謂之曰苟不入吾郡何
爲入吾郭淳之笑曰潛游者不識其水巢棲者非辨
其林飛沉所至何問其主終不肖往元嘉初徵爲散

騎侍郎乃逃于上虞縣界家人莫知所之

○翟法賜

翟法賜潯陽柴桑人也構屋於廬山以獸皮結草爲衣雖鄉族親黨亦罕接見州奉詔徵爲著作佐郎逃避不就太守鄧文子上表謂若逼以王憲束以嚴科馳山獵草以期必獲恐致顛隕有傷盛化乃止後卒於巖石之間不知年月

○臧榮緒

臧榮緒東莞莒人也純篤好學括東西晉爲一書紀

錄志傳百一十卷。隱居京口。教授齊高帝。徵爲揚州王簿。不就。自號被褐先生。

○朱桃椎

朱桃椎。成都人也。結廬山中。夏則裸。冬緝木皮以自蔽。贈遺一無所受。嘗織芒屨。置道上。見者曰。此居士屨也。以米茗易之。且其處乃取屨去。日以爲常。終不與人接。其爲屨用草柔細。環結促密。人爭易之。高士廉爲長史。請見與語。瞪視不荅。

○孫思邈

孫思邈京兆華原人通百家說善言老子莊周洛陽
總管獨孤信見其少思之曰聖童也顧器大難爲用
爾及長居太白山隋文帝輔政以國子博士召不拜
密語人曰後五十年有聖人出吾且助之太宗初召
詣京師年已老而聽視聰瞭帝歎曰有道者欲官之
不肖受顯慶中復召見拜諫議大夫固辭上元元年
稱疾還山高宗賜良馬假鄱陽公主邑司以居之思
邈於陰陽推步醫藥無不善孟詵盧照隣等皆事之
照隣有惡疾感而問之思邈委曲詳答皆可聽初魏

徵等修齊梁周隋等王家史、屢咨所遺、故其傳最詳。
永寧初卒、年百餘歲。孫處約嘗以諸子見思邈、曰：「俊
先顯、侑晚貴、佗禍在執兵、後皆驗。」太子詹事盧齊卿
之少也。思邈曰：「後五十年、位方伯。吾孫爲屬吏、願自
愛。」時思邈之孫溥尚未生、及溥爲蕭丞、而齊卿徐州
刺史。

○武攸緒

武攸緒、則天皇后兄惟良子也。恬淡寡欲、好易、莊周
書。少變姓名、賣卜長安市、得錢輒委去。后革命、封安

平郡王從封中岳固辭官願隱居后疑其詐許之以
觀所爲攸緒廬巖下如素遁者盤桓龍門沙室間冬
蔽茅椒夏居石室所賜金銀鐙帛野服王公所遺鹿
裘素障瘿栝麈尾皆流積不御市田潁陽與家奴雜
作自混於民晚年肌肉消青目腫有紫光晝能見星
中宗初降封巢國公遣國子司業杜愼盈齋書以安
車召拜太子賓客攸緒苦祈還山安樂公主出降又
遣通事舍人李邈以璽書迎之將至帝敕有司卽兩
儀殿設位行問道禮詔見日山帔葛巾不名不拜攸

緒至更冠帶伏入通事舍人贊就位攸緒趨就常班
再拜帝愕然禮不及行親貴求謁寒溫外默無所言
乃復聽還俄而諸韋誅武氏連禍唯攸緒不及睿宗
恐其不自安下詔慰諭復召拜太子賓客不就譙王
重福之亂攸緒以誣被繫張說表置廬山中書令姚
元崇奏攸緒在武后時未嘗輒出今州縣逼遣士爲
驚嗟願詔賜嵩山舊居令州縣存問詔可開元十一
年卒

○崔覲

崔觀城固人老無子乃以田宅財貲分給奴婢各爲業而身與妻隱南山約奴婢過其舍則給酒食夫婦嘯詠相視爲娛文宗時詔以起居郎名辭疾不至

○陸龜蒙

陸龜蒙字魯望少高放舉進士一不第遂棄去居松江甫里多所論撰性嗜茶置園顧渚山下歲取租茶自判品第時乘舟設蓬席束書茶竈筆床釣具隨意往來時謂江湖散人或號天隨子甫里先生

○司空圖

司空圖字表聖河中虞鄉人也少有俊才未爲鄉里所稱會王凝自尚書郎出爲絳州刺史圖以文謁之大爲凝所賞由是知名未幾凝入知制誥遷中書舍人知貢舉擢圖上第凝出爲宣州觀察使辟圖爲從事既渡江御史府奏圖監察下詔追之圖感凝知己不忍離幕府滿百日不赴闕爲臺司所劾遂以本官分司久之徵拜禮部員外郎俄知制誥故集中有文曰戀恩稽命點繫洛師於今十年方忝綸閣圖見唐政多僻中官用事知天下必亂卽棄官歸中條山尋

以中書舍人徵又拜禮部戶部侍郎皆不起及昭宗播遷圖以密邇卽時奔問復辭還山故詩曰多病形容五十三誰憐借笏趨朝叅河中節度使王重榮請圖撰碑得絹數千匹圖致虞鄉市心恣鄉人所取一日而盡是時盜賊充斥獨不入王官谷河中士人依圖避難獲全者甚衆昭宗東遷又以兵部侍郎召至洛下爲柳璨所阻一謝而退梁篡位徵爲禮部尚書以老病辭卒年八十餘按梁室如敬翔李振杜曉楊等皆唐朝舊族重族累將三百餘年一旦委質朱梁

其甚者贊成弑逆言之鳴邑唯圖清直避世終身不仕焉

○陳搏

陳搏字圖南號扶搖子亳州真源縣人也與老子同鄉里四五歲猶不能言一日戲渦水之濱有青衣媼召置懷中乳之始能言及長親喪先生曰吾將遊泰山之巔與安期黃石輩論出世法合不歟藥安能與世俗輩脂韋汨沒出入生歟輪迴間哉乃盡散其家業惟攜一石鐫而去野冠草服行歌坐樂日遊市肆

或上酒樓、或宿野店、或遊京國、後唐明宗聞先生名、
親爲手詔召先生至、則長揖賜號清虛處士、并賜宮
女三人、先生爲表謝上、并有詩云、雪爲肌、體玉爲腮、
多謝君王送出來、處士不生巫峽夢、空煩雲雨下陽
臺、以書奏付宮使、卽時遞去、自言嘗遇鹿皮處士、謂
武當山九室岩可居、遂往棲焉、服氣辟穀、凡二十餘
年、撰指玄篇八十一章、入室還丹詩五十首、又作釣
潭集萬餘字、皆羅縷道妙、包括至直、嘗夜立庭間、見
金人持劒呼曰、子道成矣、當有歸成之地、先生曰、金

人云歸成之地蓋秋爲萬物之所歸也吾其隱於西方乎是時年已七十餘俄移居華山得古雲臺觀基闢荆榛而居之以契歸成之語唐開元中有李琪者隱於華陽與先生遊更相酬倡先生常閉門臥累月不起周世宗顯德中有尋訪者窺其戶聞其無人惟獸跡鳥聲而已有樵於山麓者見有遺骸生塵迫而視之乃先生也捫其心獨暖州將以聞世宗召見禁中月餘方起因問以黃白事對曰陛下爲四海之主當以政治爲念何畱意於小道邪世宗不以爲忤拜

諫議大夫固辭賜錢白雲先生遣還山詔州縣長吏
常存問之宋太祖登極召不至與國初始赴召太宗
詔服華陽巾草屨垂綵以賓禮見於延英殿賜坐延
問甚久時上方征河東先生諫止之會軍已興上不
樂及兵還不利先生乃乞歸四年復來始云河東可
取暨王師再舉果執劉繼元平并州上謂宰相宋琪
等曰博方外之士在華山已四十餘載度其年蓋百
餘歲語論甚高因遣中使送至中書琪等從容問曰
先生得玄默之道可以教人乎對曰博不知吐納養

生之理神仙黃白之事非有方術可傳假令白日冲
天亦何益於世教聖上博達今古深究治亂真有道
仁明之主是君臣同德致理之時勤行修煉無以加
此琪等稱善以其語白上上益重之下詔賜號希夷
先生上屢與之屬和詩什問曰若昔堯舜之爲天下
今可至否先生云土階三尺茅茨不剪其迹似不可
及然能以清靜爲治卽今之堯舜也上善其對欲拜
諫議大夫固辭乞歸上知其不可畱卽賜宴便殿詔
宰臣兩禁赴宴爲詩以寵其行仍賜龜鶴鞍馬束帛

又詔華陽刺史王祚時就存問其後再遣中使就山
宣召先生意甚堅使回具奏上又遣中使齎手詔茶
藥等物賜之仍仰所屬太守縣令以安車軟輪異數
迎先生先生乃爲表謝上曰丁寧溫詔盡一札之細
書曲軫宸恩賜萬金之良藥仰佩聖慈俯躬增感臣
明時閒客唐室書生堯道昌而優容許由漢世盛而
善存四皓嘉邈之士何代無之再念臣形如槁木心
若灰灰不曉仁義之淺深安識禮儀之去就敗荷作
服脫簪爲冠體有青毛足無草履倘臨軒陛貽笑聖

明願回天聽得隱此山聖世優賢不忝前古數行丹
詔徒煩彩鳳銜來一片閒心已被白雲留住獲飲舊
溪之水飽聆松下之風咏咏日月之清笑傲雲霞之
表遂性所樂得意何言雖潛至道之根芽盡陶聖域
之水土敢祇睿眷俯順愚衷先生經史浩博尤精易
學鑒人察物辨別聖凡宋太祖太宗龍潛時與趙忠
獻公遊長安市先生與之同入酒肆公因坐右席先
生曰汝紫薇帝垣一小星爾敢據上次乎周世宗宋
太祖同行先生云城外有二天子氣陳康肅公堯咨

既登第過謁先生坐中有道人髻髻意象軒傲目康肅公連言曰南菴南菴語已經去康肅公深異之問曰向者何人先生曰鍾離子也康肅公惘然欲追之先生笑曰已數千里矣康肅曰南菴何謂也先生曰他日自知其後康肅轉漕閩中巡行墟里間聞田婦呼其子曰汝去南菴趣汝父歸康肅大驚問南菴所在視之則廢伽藍也有碣云某年月日南菴主人滅祠其真身子此乃康肅公生辰也先生稀到人間或遊華陰華陰令王睦聞先生來倒履門迎既坐先生

曰子更一年有大災吾之此來有意救子子守官如是雖有患神理亦祐子乃出藥一粒睦起再拜受而服之睦回都下馬驚墮汴水善沒者救之得不歿關中逸人呂洞賓有道術雖數百里頃刻輒到世以爲神仙常數至先生齋酬倡曾當春月於華山水邊石上閒步見壺公赤松子呂洞賓相繼至有地神獻果一盤酒一器飲酌半酣各賦詩一首先生曰春暖羣花半開逍遙石上徘徊曾垂玉勒金闕閒踏青山碧苔洞中睡來幾載流霞獨飲千杯逢人莫說人事笑

指白雲去來。壺公曰：壺中自有樓臺四季，羣花競開。閒時則飲瓊液，醉後或臥青苔。逍遙非關名利，落魄不染塵埃。逢人莫說人事，笑指白雲去來。赤松子曰：乍離南山竹齋，因過舊隱天台。洞中美酒纔熟，路上羣花半開。我骨非是凡骨，君才亦是仙才。逢人莫說人事，笑指白雲去來。呂洞賓曰：落魄直至此來，曾經幾度花開。悶便着錢沽酒，恣意千杯萬杯。閒遊八十三天，醉上茅君醮臺。逢人莫說人事，笑指白雲去來。先生一日謂賈得昇曰：今日有佳客至，當速報少頃。

一人衣短褐青巾叩門賈未及報其人倏爾遂去先生遽令追之一里餘復遇老人衣鹿皮者曰我神仙李八百也動則行八百里言竟亦失所在又晤老人鹿衣者乃太清得道白鹿先生李阮也先生曰吾其不可久留世矣端拱元年一日語門人曰吾來歲中元後當遊我眉明年遣門人鑿石室於張超谷既成往造之曰吾其歸於此乎卽草遺表其略云臣大數有期聖朝難戀已於今年十月二十二日化形於蓮花峰下張超谷中遣賈得昇并龜鶴鞍馬詣闕以進

上獨覽久之。以龜鶴鞍馬復賜得昇。仍賜紫服并賜號曰悟真。又予錢五百萬。俾營北極殿以終其志。享年一百一十八歲。得昇繼其觀事。

河南節度使李守正叛周高祖。爲樞密使討之。有麻衣道者謂趙普曰。城下有三天子氣。守正安得久。未幾城破。先是守正子婦符彥卿女也。相者謂貴不可言。守正曰。有婦如此。吾可知也。叛意乃決。城破。舉家自焚。符氏坐堂上不動。兵入叱之曰。吾父與郭公有舊。汝輩不可以無禮。公乃命柴世宗納之。後爲皇后。

三天子氣者周高祖柴世宗本朝藝祖也

錢若水爲舉子時見先生先生曰明日再來若水如期往見有一老僧與希夷擁地爐坐僧熟視若水久之以火著畫灰做不得三字徐曰急流中勇退人也後若水登科爲樞密副使年才四十致政希夷初謂若水有仙風道骨命老僧觀之僧云做不得做不得故不復畱老僧者麻衣道者也

一云搏唐長興中進士遊四方有大志隱武當山詩云他年南面去記得此山名蓋唐末時詩也常乘白

騾從少年數百欲入汴州中途聞藝祖登極大笑墜
騾曰天下於是定矣遂入華山爲道士葺唐雲臺觀
居之藝祖召不至太宗召以羽服見於延英殿顧問
甚久帝以其善相人也遣詣南衙見真宗及門亟還
問其故曰王門厮役皆將相也何必見王建儲之議
遂定真宗卽位先生已化因西祀汾陰幸雲臺觀謁
其祠加禮焉博好讀易以數學授穆伯長穆授李挺
之李授康節邵堯夫以象學授种放放授廬江許堅
堅授范諤此一枝傳於南方也又云希夷一日令洒

掃庭除曰當有佳客至。頃吏明逸作樵夫拜于庭下。希夷挽之而上曰君豈樵者二十年後當爲顯官名聲聞天下。明逸曰某以道義來官祿非所問也。希夷笑曰人之貴賤莫不有命貴者不可爲賤亦猶賤者不可爲貴。君相當爾。雖晦迹山林竟不能安。異日自知之。又謂明逸曰君不娶可得中壽。明逸從之。果至六十歲卒。先是希夷爲明逸卜上世葬地於豹林谷下不定穴。旣葬希夷見之言地固佳。安穴稍後。世世當出明將。明逸不娶無子。自其姪世衡至今爲將帥。

有聲

○魏野

魏野，陝州人。母嘗夢引袂於月中，承兔，因有娠，遂生野。及長，嗜吟咏，居州之東郊，手植竹樹，清泉環遶，旁對雲山，景趣幽絕。鑿土袤丈，曰樂天洞，前爲草堂，彈琴其中。好事者多載酒從游，嘯詠終日。野不喜巾幘，無貴賤皆白衣，以見。真宗祀汾陰，歲與李漬並被薦。野上言曰：麋鹿之性，頃纓則狂，豈能瞻對殿墀，仰奉清燕？上乃遣使圖其所居，觀之，復遣內侍存問。

○林逋

林逋字君復錢塘人少孤力學不爲章句性恬淡家貧衣食不足晏如也初放遊江淮間後歸杭州結廬西湖之孤山二十年足不及城真宗聞其名賜粟帛詔長吏歲時勞問常畜兩鶴縱之則飛入雲霄盤旋久之乃下逋時時泛小艇遊西湖諸寺惟畱一童子應門客至童子延客縱鶴良久逋掉而歸蓋常以鶴飛爲客至之驗云自爲墓於廬側臨終爲詩有茂陵他日求遺藁猶喜曾無封禪書之句旣卒仁宗嗟悼

賜謚和靖先生。賻粟帛。逋善行書。喜爲詩。旣就藁。隨輒棄之。嘗客臨江時。李諮方舉進士。未有知者。逋謂人曰。此公輔器也。及逋卒。諮適罷三司使。爲州守。素服與其門人臨七日。葬之。逋不娶。無子。

○張塋

張塋字子厚。常州人。登進士甲科。以無他兄弟。獨養其親。親友強之仕。乃調清溪主簿。亦不之官。閉戶讀書四十年。手校數萬卷。元豐中。近臣薦其高行。至元佑。大臣復薦之。起敎授潁州。辭不就。于是孫覺胡宗

愈范祖禹交章言曰。學且成。草萊後世必以爲朝廷
失士。蘇軾言之尤切。詔拜秘書郎。敕郡縣致禮敦請。
竟不出。學孝弟。修于家。忠信行于友。聲名聞于人。蹈
中守常。從容不迫。爲當時名流所慕。以不造門爲恥。
崇寧四年卒。詔以學隱德丘園。聲聞顯著。賜謚曰正
素先生。

○順昌山人

順昌山人靖康末。有避亂於順昌山中者。深入得茅
舍。主人風裁甚整。卽之語士君子也。怪而問曰。諸君

何事挈妻孥能至是耶。因語之故。主人問曰。亂何自起。衆爭爲言。主人嗟惻久之。曰。我父仁宗朝人也。自嘉祐末。卜居于此。因不復出。以我所聞。但知有熙寧紀年。亦不知于今幾何年矣。

○劉因

劉因字夢吉。保定容城人。因生之夕。父述夢神人馬載一兒至其家。曰。善養之。旣覺而生。乃名曰駟。字夢驥。後改今名及字。因天資絕人。三歲識書。日記千百言。甫弱冠。才氣超邁。初爲經學。究訓詁疏釋之說。輒

嘆曰聖人精義殆不止此及得周程張邵之書曰我固謂當有是也嘗愛諸葛孔明靜以修身之語表所居曰靜修不忽术以因學行荐于朝至元十九年有詔徵因擢承德郎右贊善大夫初裕皇建學宮中命贊善王恂敎近侍子弟恂卒廼命因繼之未幾以母疾辭歸明年丁內艱二十八年詔復遣使者以集賢學士嘉議大夫徵因以疾固辭且上書宰相曰因自幼讀書接聞大人君子餘論雖他無所得至如君臣之義自謂見之甚明如以日用近事言之凡吾人所

以得安居暇食以遂其生聚之樂者誰之力歟皆君
上之賜也是以凡我有生之民或給力役或出知能
亦必各有以自效焉始爲知義矣今因生四十三年
矣未嘗效尺寸之力以報國家養育生成之德而恩
命連至因尚敢偃蹇不出貪高尚之名以自媚哉且
因之立心自幼及長未嘗一日敢爲崕岬卓絕之行
但或者得之傳聞不求其實止以蹤跡之近似者觀
之是以有高人隱士之目耳向先儲皇以贊善之命
來召因卽與使者俱行再奉旨令教學因卽時應命

後聞老母中風請還省視不幸彌留竟遭憂制因豈
有意于不仕邪今聖天子選用賢良一新時政雖前
日隱晦之人亦將出而仕矣況因邪況加以不次之
寵處以優崇之地邪是以形畱意往命與心違病臥
空齋惶恐待罪因素有羸病自去年喪子憂患之餘
繼以疝瘡歷夏及秋後雖平復然精神氣血已非舊
矣不意今歲五月二十八日瘡疾復作至七月初一
日蒸發舊積腹痛如刺下血不已偶念自歎旁無期
功之親家無紀綱之僕一旦身危朝露必至累人遂

遣人於容城先人墓側修營一壙。儻病勢不退，便當居處其中，以待盡。遣人之際，未免傷感。由是病勢益增，飲食極減。至二十一日，使者持命來至。因初聞之，惶怖無地。徐而思之，竊謂供職雖未能扶病而行，而恩命則不敢不扶病而趨。是以卽日拜受，畱使者相候。病愈，遷延至今。服療百至，略無寸效。乃敢請使者先行，仍令學生李道恒納上鋪馬聖旨。待病稍退，自備氣力，倍道急進。望閣下俯加矜憫，曲爲保全。因實疏遠微賤之臣，與帷幄諸公不同。其進與退，本非難。

處之事故敢望閣下始終成就之書上帝聞之亦曰古有不召之臣其斯人之徒歟三十年四月六日卒年四十五無子聞者嗟悼延祐中贈翰林學士資善大夫護軍追封容城郡公諡文靖歐陽玄嘗贊因畫像曰微點之狂而有沂上風雩之樂資由之勇而無北鄙鼓瑟之聲於裕皇之仁而見不可畱之四皓以世祖之略而遇不能致之兩生嗚呼麒麟鳳凰固宇內之不常有也然一鳴而六典作一出而春秋成則其志不欲遺世而獨往也明矣亦將從孔子周公之

後爲往聖繼絕學爲來王開太平者邪論者以爲知
言因所著號丁亥集其小學四書語錄皆門生故友
所錄惟易繫辭說乃因病中親筆

藏書外臣傳心隱吏隱門目錄卷六十

魯仲連

別見

阮籍

劉伶

王績

李白

別見

种放

以上皆心隱外臣

侯羸

別見

張良

別見

東方朔

楊雄

別見

胡廣

譙周

王導謝安

別見

白居易

別見

鄭縉

馮道

以上皆吏隱外臣

藏書外臣傳卷六十

○心隱

○阮籍

附咸瞻子

阮籍字嗣宗、陳留尉氏人也。父瑀、魏丞相掾、知名於世。籍容貌瓌傑、志氣宏放、傲然獨得、而喜怒不形、或閉戶視書、累月不出、或登臨山水、經日忘歸、博覽羣籍、而好莊老、嗜酒、能嘯、善彈琴、當其得意、忽忘形骸、時人多謂之癡。惟族兄文業每歎服之、以爲勝已。嘗隨叔父至東郡、兗州刺史王杲請與相見、終日不開。

一言太尉蔣濟聞其有雋才而辟之籍詣都亭奏記
曰伏惟明公以含一之德據上台之位英豪翹首俊
賢抗足開府之日人人自以爲椽屬辟書始下而下
走爲首昔子夏在于西河之上而文侯擁篲鄒子處
于黍谷之陰而昭王陪乘夫布衣韋帶之士孤居特
立王公大人所以禮下之者爲道存也今籍無鄒卜
之道而有其陋猥見採擢無以稱當乞廻謬恩以光
清舉初濟恐籍不至得記欣然遣卒迎之而籍已去
濟大怒于是鄉親共喻之乃就吏後謝病歸復爲尚

書郎少時又以病免及曹爽輔政名爲叅軍籍因以疾辭屏居鄉里歲饑爽誅故時人服其遠識焉司馬懿爲太傅命籍爲從事中郎及帝崩復爲司馬師太司馬從事中郎籍本有濟世志屬魏晉之際天下多故名士少有全者籍由是不與世事以酣飲爲常昭初欲爲子炎求婚于籍籍醉六十日不得言而止鍾會數以時事問之皆以酣醉獲免及司馬昭輔政籍從容言于昭曰籍平生曾游東平樂其風土昭大悅卽拜籍東平相籍乘驢到郡壞府舍屏障使内外相

望法令清簡旬日而還昭引爲大將軍從事中郎有
司言子殺母者籍曰嘻殺父乃可至殺母乎坐者怪
其失言昭曰殺父天下之極惡而以爲可何也籍曰
禽獸知母而不知父殺父禽獸之類也殺母禽獸之
不若衆乃悅服籍聞步兵廚營人善釀有貯酒三百
斛求爲步兵校尉會昭讓九錫公卿將勸進使籍爲
其辭籍沉醉忘作臨詣府使取之見籍方據案醉眠
使者以告籍便書奏使寫之無所改竄辭甚清壯爲
時所重籍雖不拘禮教然發言玄遠口不臧否人物

性至孝。母終。正與人圍棋。對者求止。籍畱與決。睹既而飲酒二斗。舉聲一號。吐血數升。及將葬。食一蒸肫。飲二斗酒。然後臨訣。直言窮矣。舉聲一號。因又吐血數升。毀瘠骨立。殆致滅性。裴楷往吊之。籍散髮箕踞。醉而直視。楷吊嘯畢。便去。或問楷。凡吊者主哭。客乃爲禮。籍既不哭。君爲何哭。楷曰。阮籍方外之士。故不崇禮典。我俗中人。宜以軌儀自居。時人歎爲兩得。籍又能爲青白眼。見禮俗之士。以白眼對之。及嵇喜來弔。籍作白眼。喜不懼而退。喜弟康聞之。乃齎酒挾琴。

造焉籍大悅乃見青眼由是禮法之士疾之若讐而司馬師每保護之籍嫂嘗歸寧籍見與別或譏之籍曰禮豈爲我設邪鄰家少婦有美色當醺沽酒籍嘗詣飲醉便臥其側兵家女有才色未嫁而死籍不識其父兄徑往哭之盡哀而還有時率意獨駕不由徑路車迹所窮輒慟哭而反嘗登廣武觀楚漢戰處曰時無英雄使豎子成名蓋譏笑師兄弟也是以他日登武牢山望京邑而歎因賦豪傑詩云景元四年冬卒年五十四作詠懷詩八十餘篇爲世所重著達莊

論救無爲之貴嘗於蘇門山遇孫登與商畧終古及棲神導氣之術登皆不應籍因長嘯而退至半嶺聞有聲若鸞鳳之音響乎巖谷乃登之嘯也遂歸著大人先生傳其畧曰世之所謂君子惟法是修惟禮是克手執圭璧足履繩墨行欲爲目前檢言欲爲無窮則少稱鄉黨長聞鄰國上欲圖三公下不失九州牧獨不見羣蟲之處禪中迺乎深縫匿乎壞絮自以爲吉兆也行不敢離縫際動不敢出禪檔自以爲得繩墨也然炎丘火流焦邑滅都羣蟲處于禪中而不能

出也。君子之處域內，何異夫強之處禪中乎？籍雖口
不論人過，而自然高邁，故爲禮法之士。何曾等所仇
司馬昭又保持之，卒以壽終。子渾字長成，有父風。少
慕通達，不飾小節。籍謂之曰：「仲容已豫吾此，汎汝不
得復爾。」或又言籍不當爲卿。冲作勸，晉王戢然改其
文。大槩謂褒德賞功，禮典之常，不必固讓而已。演義
論步兵勸進之文，醉不欲爲而強迫爲之，非楊雄甘
爲美新者比。是則然矣，而未盡也。咸字仲容，父熙武。
都太守咸任達，不拘與叔父籍爲竹林之游。太原郭

奕高。幾有識量。少所推先。見咸。心醉不覺。歎焉。咸妙

解音律。善彈琵琶。雖處世不交人事。惟共親知。弦歌

似卓老

酣飲而已。與從子修特相善。每以得意爲歡。瞻字千

里。性清虛寡欲。自得於懷。善彈琴。人聞其能。多往求

聽。不問貴賤。長幼皆爲彈之。神氣冲和。不知向人所

在。內兄潘岳每令鼓琴。終日達夜。無忤色。由是識者

歎其恬淡。不可榮辱矣。瞻素執無鬼論。忽有客通名

詣瞻。寒溫畢。聯談名理。良久。及鬼神事。反覆甚苦。客

遂屈乃作色曰。鬼神古聖共傳。君何得獨言無。卽僕

便是鬼於是變爲異形須臾消滅瞻然意色太惡
歲餘病卒字遙集其母卽胡婢也嘗以金貂換酒
爲所司彈劾帝宥之咸和初拜丹陽尹時太后臨朝
政在舅族孚謂所親曰今江東雖累世而年數實淺
主幼時艱運終百六而庾亮德信未孚以吾觀之將
兆亂矣會廣州刺史劉顥卒乃除廣州刺史假節未
至鎮卒年四十九尋蘇峻作逆識者以爲知幾

○劉伶

劉伶字伯倫沛國人也身長六尺容貌甚陋放情肆

志常以宇宙爲狹、有時乘鹿車、攜一壺酒、使人荷鍤、隨之曰、死便埋我、其遺形骸如此、嘗渴甚、求酒于其妻、妻捐酒毀器、涕泣諫曰、君酒太過、非攝生之道、必宜斷之、伶曰、善、吾不能自禁、惟當祝鬼神自誓耳、便可具酒、肉妻從之、伶跪而誓曰、天生劉伶、以酒爲名、一飲一斛、五斗解醒、婦兒之言、慎不可聽、仍飲酒、御肉、隗然復醉矣、一日因大醉、與俗人忤、其人攘袂奮拳而往、伶徐曰、雞肋不足、以安尊拳、其人笑而止、平生未嘗厝意文翰、惟著酒德頌一篇、其辭曰、有大人

先生以天地爲一朝萬期爲須臾日月爲局牖入荒
爲庭衢行無轍迹居無室廬幕天席地縱意所如止
則操卮執觚動則挈榼提壺惟酒是務焉知其餘有
貴介公子縉紳處士例世人說卓老聞吾風聲議其所以乃奮袂攘
襟怒目切齒陳說禮法是非蜂起先生于是方捧甕
承槽銜杯漱醪奮髯箕踞枕麴藉糟無思無慮其樂
陶陶兀然而醉恍然而醒靜聽不聞雷霆之聲熟視
不覩太山之形不覺寒暑之切肌利欲之感情俯觀
萬物擾擾焉若江海之載浮萍二豪侍側焉如蜾蠃

之與蜃蛤

○王績仲長子光

附負苓者傳

王績字無功，絳州龍門人也。性簡放，不喜拜揖，兄通聚徒河汾間，倣古作六經，又爲中說以擬論語，知績誕縱，不嬰以家事，鄉族慶弔，冠昏不與也。有田十六頃，在河渚間，仲長子光亦隱者也。無妻子，結廬北渚，凡三十年，非其力不食。績愛其真，徙與相近。子光瘖，未嘗交語，與對酌酒，懽甚。績有奴婢數人，種黍，春秋釀酒，養鳬鴈，時藥草自供，以周易老子莊子置牀頭。

他書罕讀也。欲見兄弟，輒渡河還家游北山。東臯著書自號東臯子，乘牛經酒肆，畱或數日。高祖武德初，待詔門下省，故事官給酒，日三升。或問待詔何樂耶？答曰：良醖可戀耳。侍中陳叔達聞之，日給一斗。時稱斗酒學士。貞觀初，以疾罷。時太樂署史焦革家善釀，績求爲丞，吏部以非流不許。績固請除之。革死，妻送酒不絕。歲餘，又死。績曰：天不使我酣美酒邪？棄官去。自是太樂丞爲清職。績追述革酒法爲經，又采杜康、儀狄以來善酒者爲譜。李淳風曰：君酒家南董也。所

居有盤石立杜康祠祭之尊爲師以革配著醉鄉記
以次劉伶酒德頌其飲至五斗不亂人有以酒邀者
無貴賤輒往又著五斗先生傳焉刺史崔喜請與相
見答曰奈何坐召嚴君平杜之松爲刺史請續講禮
答曰吾不能揖讓邦君門談糟粕棄醇醪也昔者文
中子講道於白牛之溪弟子捧書北面還堂成列講
罷薛收嘆曰不及伏羲氏乎何詞之多也俄而有負
苓者瞤瞤然委檐而息曰吾子何嘆夫麗朱者丹附
墨者黑蓋漸而得之也今吾子所服者道而猶有嘆

是六府五臟不能無受也。薛生曰：收聞之師易者，道之蘊也。伏羲畫卦而文王繁之，不逮省文矣。以爲文王病也，吾是以嘆負苓者曰：文王焉病？伏羲氏病甚者也。昔者伏羲氏之未畫卦也，三才其不立乎？四序其不行乎？百物其不生乎？萬象其不森乎？何營營乎？而費畫也。自伏羲氏洩道之密，漏神之幾，分張大和，礫裂元氣，使天下之智者詭道逆出，曰：我善言象，而識物情，陰陽相磨，遠近相取，作爲剛柔之說，以駭人志。於是知者不知，而大朴散矣。則伏羲氏始兆亂者。

安得會嘆而嗟文王負其琴而行

○种放

种放字明逸河南洛陽人也放沉默好學父嘗令舉進士放辭以業未成不可妄動每往來嵩華間慨然有意未幾父卒數兄皆干進獨放與母俱隱終南豹林谷之東明峯結草爲廬僅庇風雨以講習爲業從學者日衆性嗜酒嘗種秫自釀每日空山清寂聊以養和因號雲溪醉侯幅巾短褐負琴攜壺沂長溪坐盤石採山藥以助飲往往終日值月夕直至宵分不

喜浮圖氏嘗裂佛經以製帷帳多爲歌詩自稱退士
淳化三年陝西轉運宋惟幹言其才行詔使召之其
母恚曰嘗勸汝勿聚徒講學果爲人知而不得安處
我將棄汝深入窮山矣於是母盡取其筆硯焚之與
放轉居窮僻處太宗嘉其節詔京兆賜以緡錢使養
母不奪其志有司歲時存問咸平元年母卒翰林學
士宋諲集賢院學士錢若水知制誥王禹偁言其貧
不克葬詔賜錢三萬帛三十匹米三十斛以助其喪
四年兵部尚書張齊賢言放隱居三十年孝行純至

可勵風俗簡朴退靜無謝古人復詔本府遣官請山
以禮發遣赴闕齋裝錢五萬放辭不起明年齊賢出
守京兆復條陳請加旌賁卽遣官齋詔名赴闕賜帛
百匹錢十萬九月放至對崇政殿以幅巾見命坐與
語詢以民政邊事放曰明王之治愛民而已惟徐而
化之餘皆謙讓不對卽日授左司諫直昭文館賜巾
服簡帶館于都亭驛大官供膳翼日表辭恩命上知
放舊與陳堯叟游令堯叟諭意不聽其讓數日復召
見賜緋衣象簡犀帶銀魚御製五言詩寵之賜昭慶

坊第一區加帷帳什物銀器五百兩錢三十萬中謝
日賜食學士院自是屢得名對六年春再表暫歸故
山詔許之將行又遷起居舍人命館閣官宴餞于瓊
林苑上賜七言詩三章十月遣使就山撫問圖其林
泉居處以獻優詔趣其入覲放以疾未平爲請景德
元年十月來朝言歸山久請計月不受俸詔特給之
上曰放體格高古聞其歸私居終日默坐一室山水
之樂亦天性也每所詢問皆據經以對頗多裨益朕
優待之益以激浮競耳二年擢爲右諫議大夫表乞

豈少養疾許之令河南府檢校名對資政殿曲宴學士院是冬復來朝三年以兄喪請告歸終南營葬復召宴賜詩放表求太宗御書及經史音疏悉給焉十月復至大中祥符元年命判集賢院從封泰山拜給事中二年四月求歸山宴餞于龍圖閣命學士卽席賦詩製原上作詩卒章云我心虛佇日無復醉山中三年正月復名赴朝表乞賜告手詔優容之作歌賜之乃齋衣罷講終令京兆府每季遣耆儒就山存問四年正月復來朝從祀汾陰拜工部侍郎放屢至闕

俄復還山人有命之者放不答放終身不娶尤惡器雜故京城賜為擇僻處然祿賜既優晚節頗飾輿服于長安良田歲利甚博亦有強市者遂至爭訟門人屬依倚恣橫王嗣宗守京兆放嘗乘醉慢罵之嗣宗遂遣人責放不法條上其事四月求歸山又賜宴遣之所居山林細民多縱樵採特詔禁止放遂表徙居嵩山天封觀側遣內侍就興觀基起第賜之假踰百日續給其俸然猶往來終南按視田畝每行必給驛乘仕道或親詬驛吏規筭糧糗之直

以此時議浸薄嘗曲宴令羣臣賦詩杜鎬以素不屬
辭誦北山移文譏之上嘗語近臣曰放爲朕言事甚
衆但外庭無知者思出所上時議十三篇八年十一
月乙丑晨興忽取前後章疏藁悉焚之服道士衣召
諸生會飲于次酒數行而卒計聞上甚嗟悼親製文
遣內侍致祭歸葬終南贈工部尚書錄其姪世雍同
學究出身初放嘗見陳搏曰子他日必白衣諫議然
名者古今之美器造物者深忌之天地間無全名子
名將起必有物敗之于其戒哉放之晚節果如圖南

之言

吏隱外臣總論

卓吾子曰。使子房不爲韓。則終始辟穀人也。且不知有吏矣。安知有吏而隱乎。旣已藉漢滅秦報韓。是以不容不吏。隱於漢耳。迹若吏。隱而心非也。吾迹其終之所就。又安得不謂之吏。隱乎。使侯生不遇公子。則終身抱關人也。一遇公子。則出奇畫策。刎頸相隨。視死如飴矣。何者。得死所也。迹若吏。隱而心亦非也。吾迹其七十之初。據其平生之寓。是以亦謂之吏。隱云耳。吾故曰。二子皆吏隱也。夫令豪傑終身不遇而卒。

老於抱關死於牖下者何限也。彼侯生之得死於公子者幸也。設不幸而不得死則將終抱關將終吏隱自不容不甘之矣。若子房者當日既不能死始皇於一擊之下他年若又不能遂滅秦之兇子房肯甘心辟穀已乎。嗚呼國士之遇也知己之感也滅國之恨也五世之冤也千載豪傑其揆一也。吏不吏隱不隱皆迹也非所論也。具眼者倘以我言爲然不

○吏隱

○東方朔

東方朔字曼倩、平原厭次人也。武帝初卽位、徵天下舉賢良方正文學材力之士、待以不次之位。四方士多上書言得失、自銜轡者以千數。其不足采者輒報聞罷。朔初來上書、曰臣朔少失父母、長養兄嫂、年十二學書、三冬文史足用、十五學擊劍、十六學詩書、誦二十二萬言、十九學孫吳兵法戰陣之具、鉦鼓之教、亦誦二十二萬言。凡臣朔固已誦四十四萬言、又嘗

服子路之言臣朔年二十二長九尺三寸目若懸珠齒若編貝勇若孟賁捷若慶忌廉若鮑叔信若尾生若此可以爲天子大臣矣臣朔昧死再拜以聞朔文辭不遜高自稱譽上偉之聖主令待詔公車奉祿薄未得省見久之朔給騶朱儒曰上以若曹無益於縣官耕田力作固不及人臨衆處官不能治民從軍擊虜不任兵事無益於國用徒索衣食今欲盡殺若曹朱儒大恐啼泣朔教曰上卽過叩頭請罪居有頃聞上過朱儒皆號泣頓首上問何爲對曰東方朔言上欲盡

誅臣等上知朔多端名問朔何恐朱儒爲對曰臣朔
生亦言死亦言朱儒長三尺餘奉一囊粟錢二百四
十臣朔長九尺餘亦奉一囊粟錢二百四十朱儒飽
欲死臣朔饑欲死臣言可用幸異其禮不可用罷之
無令但索長安米上大笑因使待詔金馬門稍得親
近

○胡廣

胡廣字伯始華容人也六世祖剛清高有志節平帝
時大司農馬宮辟之值王莽居攝剛解其衣冠縣府

門而去、遂亡命、交趾、隱於屠肆之間、後莽敗、乃歸鄉里、父寵、交趾都尉、廣少孤、貧親執勤苦、長大、隨輩入郡爲散吏、太守法雄之子真從家來、省其父、會歲終、應選舉、雄敕真助求其才、雄因大會諸吏、真自牖牖間、密占察之、乃指廣以白、雄遂察孝廉、既到京師、試以章奏、安帝以廣爲天下第一、旬月拜尚書郎、五遷尚書僕射、順帝欲立皇后、而貴人有寵者四人、莫知所建議、欲探籙以神定、選廣與尚書郭虔史敞上疏諫、帝從之、以梁貴人良家子、定立爲皇后、時尚書令

左雄議改察舉之制限年四十以上儒者試經學文
吏試章奏廣復與敞上書駁之曰竊惟選舉因木
無拘定制六奇之策不出經學鄭阿之政非必章奏
甘奇顯用年垂彊仕終賈揚聲亦在弱冠漢承周秦
兼覽殷夏今以一臣之言刻戾舊章若事下之後議
者剝異異之則朝失其便同之則王言已行不從漢
安元年遷司徒質帝崩代李固爲太尉錄尚書事以
定策立桓帝封育陽安樂鄉侯以病遜位又拜司空
告老致仕尋以特進徵拜太常遷太尉九年復拜司

徒靈帝立與太傅陳蕃參錄尚書事會蕃被害代爲
太傅總錄如故時年已八十而心力克壯繼母在堂
朝夕瞻省傍無几杖言不稱老性溫柔常遜言恭色
以避權害達練事體明解朝章雖無謇直之風屢有
補闕之益故京師諺曰萬事不理問伯始天下中庸
有胡公自在公台三十餘年歷事六帝禮任甚優每
遜位辭病及免退出里未嘗滿歲輒復升進凡一履
司空再作司徒三登太尉又爲太傅其所辟命皆天
下名士與故吏陳蕃李咸並爲三司蕃等每朝會輒

稱疾避廣時人榮之年八十二熹平元年薨使謁者
護喪賜冢塋于原陵謚文恭侯拜家一人爲郎中故
吏自公卿大夫博士議郎以下數百人皆綴經殯位
自終及葬漢興以來人臣之盛未嘗有也熹平六年
靈帝思感舊德乃圖畫廣及太尉黃瓊於省內詔議
郎蔡邕爲其頌曰巖巖山嶽配天作輔降神有周生
申及甫允茲漢室誕育二后曰胡曰黃方軌齊武惟
道之淵惟德之藪股肱元首代作心膂天生蒸人有
則有類我胡我黃鍾厥純懿巍巍特進仍踐其位赫

夕臣傳
赫三事七佩其紱奕奕四牡沃若六轡袞職龍章其
文有蔚參曜乾台窮寵極貴功加八荒羣生以遂超
哉邈乎莫與爲二

卓吾曰甚矣殺身之難也世之人士動以殺身律人
過矣使必皆殺身而後可此賢者所以終身岩穴不
肯見於世也胡廣趙誠雖不能如李杜之極諫力爭
然李杜旣死仍復有李杜者相繼而起羅列於朝誰
之力歟其與自殺而遂已者厥功倍矣故曰天下中
庸有胡公信哉其爲中庸也豈若張禹者以帝師之

重言聽計從乃曲意阿鳳專爲孫謀者比乎吾是以亦謂更隱也蓋隱於無名者也

○譙周

譙周西充人也幼孤旣長耽古篤學誦讀典籍欣然獨笑以忘寢食身長八尺體貌素朴無造次辨論之才然潛識內敏諳曉天文建興中丞相亮領益州牧命周爲勸學從事周初見亮左右皆笑旣出有司請推笑者亮曰孤尚不能忍況左右乎亮卒周在家聞問知也卽便奔赴後姜維連年攻魏百姓凋敝周作仇國

論以諷之。及鄧艾伐蜀，周勸後主出降。時議欲奔吳，或欲奔南中。惟周以爲自古以來，無寄他國爲天子者也。今若入吳，固當臣服，且政理不殊，則大能吞小，此數之自然也。由此言之，則魏能吞吳，吳不能并魏，明矣。等爲小稱臣，孰與爲大再辱之耻？何與一辱且若欲奔南，則當早爲之計。今大敵已近，禍敗將及，羣小之心，無一可保。恐發足之日，其變不測。何至南之有乎？羣臣或難周曰：「又若不受降，其如之何？」周曰：「方今東吳未賓，勢不得不受。旣受，不得不禮。後主猶疑。」

周乃上疏曰易稱知得失存亡而不失其正者其惟聖人乎言聖人知命而不苟必也故堯舜以于不善知天有授而求授人子雖不肖禍尚未萌而迎授與人况禍已至乎故微子以殷王之昆面縛銜璧而歸武王豈所樂哉不得已也於是遂從周策劉氏無虞一國蒙賴周之謀也時晉文王爲魏相國以周有全國之功封陽城亭侯又下書辟周周因病不進咸熙二年夏巴郡文立從洛陽還蜀過見周周以書板示立曰典午忽兮月酉沒兮典午謂司馬也月酉者謂

八月也至八月而文王果崩晉室踐祚累下詔所在發遣周周遂輿疾詣洛泰始三年至以疾不起就拜騎都尉周乃自陳無功而封求還爵土皆不聽詎五年陳壽嘗爲本郡中正周語壽曰昔孔子七十二劉向楊雄七十一而沒今吾年過七十庶慕孔子之遺風可與劉楊同軌恐不出後數歲必便長逝不復相見矣六年秋爲散騎常侍篤疾不拜至冬果卒

○鄭繁

鄭繁字蘊武以進士登第累擢左司郎中家貧求郡

出爲廬州刺史黃巢自嶺表還經淮南剽掠廢移黃
奇○巢○自○嶺○表○還○經○淮○南○剽○掠○廢○移○黃
巢文牒請無犯郡界巢笑而從之一郡獨不被寇羅
郡贏錢千緡寄州帑後郡治數陷盜終不肯犯鄭使
君寄庫錢繁善爲詩多侮劇刺時故落格調時號鄭
五歌後體初去廬江與郡人別云唯有兩行公解淚
一時洒向渡頭風滑稽皆此類也遷給事中僖宗以
杜弘徽爲中書舍人弘徽宰相杜讓能之弟也繁以
弘徽兄在中書弟不宜同居禁近封還制書不報繁
卽移病休官無幾以左散騎常侍還徵朝政有闕繁

上章論列事雖不行喧傳都下執政惡之改國子祭
酒光化初昭宗還宮庶政未愜縻每形於詩休中人
或誦其語於上前昭宗見其激訐就常奏班簿側注
云鄭縻可禮部侍郎平章事中書胥吏詣其家叅謁
縻笑而問之曰諸君大悞俾天下人並不識字宰相
不及鄭五也胥吏曰出自聖旨縻抗其手曰萬一如
此笑殺他人明日果制下親賓來賀縻搔首言曰歌
後鄭五作宰相時事可知矣累表遷讓不獲既入視
事侃然守道無復詆諧三月餘移疾乞骸以太子少

保致仕光化二年卒

○馮道

馮道瀛州景城人也事劉守光爲叅軍守光敗去事
宦者張承業承業監河東軍以其文學薦之晉王爲
河東節度掌書記莊宗卽位拜戶部侍郎充翰林學
士道爲人能自刻苦爲儉約當晉與梁夾河而軍道
居軍中爲一茅菴不設牀席臥一束芻而已所得俸
祿與僕廝同器飲食諸將有掠得美女以遺道者道
不能却皆寘之別室訪其主而還之其解學士居父

喪遇歲饑悉出所有以周鄉里而退耕于野躬自負薪有荒其田不耕者道夜潛往爲之耕服除復召翰林學士行至汴州遇趙在禮作亂明宗自魏擁兵還犯京師莊宗遇弒明宗卽位雅知道拜道端明殿學士遷兵部侍郎歲餘拜中書侍郎同平章事天成長興之間歲屢豐熟中國無事道戒明宗曰臣爲河東掌書記時奉使中山過井陘之險懼馬蹏失不敢怠於銜轡及至平地謂爲無事反致傷失凡蹈危者慮深而獲全居安者患生於所忽不可不慎也明宗曰

天下雖豐百姓濟否道曰穀貴餓農穀賤傷農因誦
文士聶夷中田家詩一首明宗顧左右錄之常以自
誦道相明宗十餘年明宗崩道相愍帝潞王反於鳳
翔愍帝出奔衛州道率百官迎入潞王是爲廢帝遂
相之廢帝卽位時愍帝猶在衛州後三日始遇殺晉
滅唐道又事晉晉高祖拜道守司空同平章事加司
徒兼侍中封魯國公高祖崩道相出帝加太尉封燕
國公契丹滅晉道又事契丹朝耶律德光於京師德
光責道事晉無狀道不能對又問曰何以朝來對曰

無城無兵。安敢不來。德光謂之曰。爾是何等老子對。

○是○眼○空○世○所○有○

曰。無才無德。痴頑老子。德光喜。以道爲太傅。德光北歸。從至常山。漢高祖立。乃歸漢。以太師奉朝請。周滅漢。道又事周。周太祖拜道太師。兼中書令。道少能矯行。以稱於世。及爲大臣。尤務持重。以鎮物。事四姓十君。益以舊德。自處然。當世之士。無賢愚。皆仰之。爲元老云。耶律德光嘗問道曰。天下百姓。如何救得。道爲俳語以對曰。此時佛出也。救不得。惟皇帝救得人。皆以謂契丹不至滅夷中國之人者。道○上與○一言之力也。周

兵反犯京師。隱帝已崩。太祖遂陽立。湘陰公斌爲漢
嗣。遣道與趙上交于度。迎贊于徐州。贊未至。太祖遂
代漢。左右知事變。欲殺道等。上交度惶怖。不知所爲。
惟道偃仰自適。畧無懼色。其視喪君亡國。未嘗屑意。
當是時。天下大亂。戎夷交侵。生民之命。急於倒懸。道
方自號長樂老。著書數百言。陳已更事四姓。及契丹
所得階勲官爵。以爲榮。卒年七十二。謚曰文懿。追封
瀛王道。旣卒。時人皆共稱嘆。以謂與孔子同壽云。
卓吾曰。馮道自謂長樂老子。蓋真長樂老子者也。孟

子曰社稷爲重君爲輕信斯言也道知之矣夫社者所以安民也稷者所以養民也民得安養而後君臣之責始塞君不能安養斯民而後臣獨爲之安養斯民而後馮道之責始盡今觀五季相禪潛移嘿奪縱有兵革不聞爭城五十年間雖經歷四姓事一十二君并耶律契丹等而百姓卒免鋒鏑之苦者道務安養之力也譙周之見亦猶是也嗚呼觀於譙周仇國之論而知後世人士皆不知以安社稷爲悅者矣然亦必有劉禪之昏庸五季之淪陷東漢諸帝之幼

冲黨錮諸賢之互爲標幟乃可不然未可以是而藉口也